

社320

83

部二



八旗通志初集卷之百六十六

名臣列傳二十六

正藍旗滿洲世職大臣二

覺羅郎邱

吳達禮

伊博克圖

兄子伊爾都

薩必漢

孫哈爾沁喀爾沁

扈查祿

父胡什子孟寶

費揚武

雅賴

弟雅海

科爾坤

弟七十八

邁堪

子傳達禮

哈爾松阿

子桑圖孫阿蘇

濟爾海

福格

黨古禮

參特赫



錫爾哈達

滿不

哈克山

父法薩禮巴圖魯

弟巴克山

穆赫林

哈占

西伯

覺羅郎邱滿洲正藍旗人

景祖翼皇帝第三兄之曾孫也。初任理事官。兼管擺牙

喇甲喇章京事。天聰九年。隨貝勒多鐸。征明廣

寧地方有功。旋緣事革退。崇德三年復職。累任

刑部承政。六年。從

太宗文皇帝征明松山。復有功。順治二年。授牛录章京

世職。三年。從平南大將軍貝勒克德渾。征湖

廣流寇。二月初二日。奉貝勒軍令。赴荆江南岸。

諭令俟賊北渡時。卽督兵勦捕。捉其船隻。時官

兵去荆州百里。晝夜疾馳。初三日早抵荆州。賊

未覺尚攻城。我兵突分兩翼直躡賊營。大破之。斬獲甚衆。薄暮收兵。郎邱已於荆江南岸獲賊船千餘隻。明年加授一等甲喇章京世職。郎邱在部院衙門最久。辦事有才。轉禮部尚書。與大學士希福等同奉。

世祖章皇帝特旨加太子太保。晉少保。以老告休。至康熙五年卒。

賜祭葬如典禮。

吳達禮。滿洲正藍旗人。姓納喇氏。世居輝發地方。祖名三禪。

太祖朝曾任扎爾固齊。父名阿柱虎。吳達禮年十七。充阿禮哈超哈。累陞噶布什賢侍衛。兼王府長史。崇德八年。陞內國史院學士。順治元年。隨定國大將軍豫親王多鐸南征。平定河南江南等處。皆有功。時海寇鄭芝龍負固不服。端重親王博洛。宗室公韓岱等議。若鄭芝龍不降。則福建非我所有。因遣吳達禮詣泉州府開諭。芝龍遂降。後五載考績。授半個前程世職。遇七年。

恩詔。加授拜他喇布勒哈番。八年。任刑部啟心郎。九年。兩遇。

恩詔。加世職至三等阿達哈哈番。十一年。陞兵部督捕左侍郎。十六年。緣事降通政司通政使。尋陞吏部右侍郎。康熙五年。以病解任。八年。起任刑部右侍郎。尋陞工部尚書。十四年。轉刑部尚書。十六年。轉禮部尚書。尋轉吏部尚書。以疾卒。孫阿林。現任正白旗護軍統領。

伊博克圖。吳達禮弟也。累任阿禮哈超哈甲喇章京。屢從征伐。著有功績。順治六年。轉擺牙喇甲喇章京。九年。遇兩次

恩詔。授世職爲拜他喇布勒哈番。十一年。隨定遠大將軍世子濟度。征福建海寇鄭成功。我師至烏龍港。賊兵來拒。衆不能渡。伊博克圖率兵八十名先渡。遇賊兵千餘。擊敗之。賊兵進圍福州府。伊博克圖躍入賊舟。力戰。又於高溪等處。大敗賊衆。斬僞總兵藍作霖。並僞都司一員。獲船十二隻。十八年。以署護軍統領。同征東將軍季什哈。征勦山東土寇于七。在事有功。後緣事革職。康熙九年。復授驍騎叅領。十三年。以署副都統。隨順承郡王勒爾錦。往征逆藩吳三桂。恢復岳州。十九年。還京。尋卒。兄伊巴漢之子伊爾都。初任

護軍叅領兼佐領。康熙十三年。從康親王傑書征逆藩耿精忠。與賊戰歿。卹授拜他喇布勒哈番。

薩必漢。吳達禮第三叔父也。累任兵部叅政。崇德六年。隨大兵征松山。中傷而歿。孫哈爾沁。任一等護衛。康熙十八年。從寧海將軍喇哈達。征福建。攻廈門。戰歿。卹授拖沙喇哈番。哈爾沁之弟喀爾沁。初任護軍叅領兼佐領。康熙十三年。從征逆藩吳三桂。攻沅江府。被石傷。得賞銀五十兩。先後得功牌三十六。三十五年。從撫遠大

將軍伯費揚古。征厄魯特噶爾丹。戰於

地方。復有功。亦授拖沙喇哈番。

扈查祿。吳達禮第四叔父胡什之子也。胡什初任擺牙喇甲喇章京。崇德二年。隨貝子碩託等。證明皮島。渡海力戰。歿於陣。贈牛录章京世職。扈查祿襲父職。六年。從大兵證明錦州有功。加半個前程。順治七年。九年。三遇

恩詔。加至二等阿達哈哈番。官至副都統。康熙十二年卒。

賜祭葬如典禮。以長子扈必漢承襲世職。次子孟寶。初

任三等護衛。署叅領。康熙十三年。從征逆藩吳三桂。在岳州戰歿。卹贈拖沙喇哈番。

費揚武。吳達禮第六叔父也。初任擺牙喇甲喇章京。兼管牛录章京事。隨

太宗文皇帝征明。由北京趨山東。至邊口。遇明馬總兵統兵來戰。費揚武率本甲喇兵擊敗之。又敗膠州城外敵兵。又與明范軍門吳總兵馬步兵戰。敗之。至濱州。以雲梯攻克其城。天聰八年。敘功授半個前程。世職順治元年。隨睿王多爾袞進山海關。破流寇。率本甲喇擺牙喇敗賊騎兵。敘

功。加授世職。爲牛录章京。十一月。隨定國大將

軍豫親王多鐸南征。二年正月。擊敗潼關山上

馬步賊兵。并流寇第一營步兵。五月。至南京。敗

敵人步軍於江寧府。七月。從征南大將軍貝勒

博洛。征浙江。敗僞大學士馬士英於杭州府關

廂。生擒僞總兵一員。又敗僞于道官兵三千六

百餘衆。僞陳總兵駐軍於海寧縣。奮擊敗之。陳

總兵復集水陸兵來犯。追敗之於平湖縣。獲戰

艦十二。并敗其餘黨。獲戰艦四。僞王總兵統兵

三萬餘來戰。連次擊敗之。從蕪湖乘船追斬僞

王相國。獲三十一艘。以功加一拖沙喇哈番。後以議政大臣。從征福建。歿於軍。奉王命。其

特旨遣官致祭。

雅賴。吳達禮之從弟也。初由旗員累官。至王府長史。康熙十三年。逆藩吳三桂反。九月。

特命署理副都統事。同一等侍衛阿喀尼。率兵駐防。州。尋

命徑赴江寧鎮守。是月。又調往江西南昌府鎮守。十月。

奉

特諭。赴彭澤湖口。勦賊。十二月。敗賊於小姑山。賊固守。

彭澤縣。我師奮勇登城克之。遂率水陸官兵。恢復都昌縣。疏通河道。招撫康山餘黨。十四年四月。復同護軍統領朗素等。進勦湖寇於烏歸寨等處。殺賊二萬餘人。獲船九百餘隻。恢復餘干縣城。七月。率兵進取廣昌。至石峽。與賊遇。賊伏兵四起。雅賴力戰。中礮歿於陣。

特恩授拜他喇布勒哈番世職。

賜祭葬如典禮。諡襄壯。子班第襲職。雅賴弟雅海。順治十七年。以前鋒叅領。從安南將軍宗室羅託。征福建海賊。攻廈門。破賊渠。鄭成功。獲船六百隻。

於澄浦嶼。康熙十四年。察哈爾布爾尼反。從撫遠大將軍信郡王鄂扎往征。破賊於大魯地方。在事有功。授拜他喇布勒哈番。

科爾坤。滿洲正藍旗人。姓阿顏覺羅氏。世居瓦穆護地方。初任饒餘貝勒護衛。天聰六年。從追察哈爾。崇德元年。從征朝鮮國。並著有勞績。

太宗文皇帝擢爲噶布什賢侍衛。五年。隨鄭親王濟爾哈郎。征明圍錦州。同索渾。胡理布。敗錦州塔山等處敵兵。又大敗松山來援兵。射殪二人。六年。隨英親王阿濟格。攻杏山。寧遠。沙河等處。同索

渾先衆擊敵。敗之。斬二人。七年十月。隨饒餘貝勒阿巴泰。征山東。與明范軍門兵數萬戰於豐潤縣。先衆奮擊敗之。又同鄂碩。敗姚軍門兵萬餘騎。至河西務。擒敵哨卒。遇敵一騎。沿河追之。敵墜河。卽下馬從水中擒之。凱旋。授牛錄章京。世職。順治元年。隨睿王多爾袞。入山海關。破流賊。同蘇爾都。率本固山兵。擊敗賊兵。又隨英親王阿濟格。追流賊至慶都縣。大敗之。六月。隨固山額真葉臣等。平定山西一帶地方。攻太原城。三戰皆捷。同蘇拜。哈寧阿。追擊流賊。大敗之。三

年。隨靖遠大將軍肅親王豪格。征四川。至漢中府。同固山額真覺羅巴哈納。敗流賊賀珍等。賊兵萬餘。十二月。賊首八大王張獻忠。中箭死。同巴哈納追擊餘賊。盡殲之。四川平。

世祖章皇帝特旨嘉獎。陞噶布什賢章京。五年九月。隨定遠大將軍鄭親王濟爾哈朗。征湖廣。同固山額真阿哈尼堪。由沅州抵武岡。路遇賊萬餘。擊敗之。斬偽楊總兵。攻湘潭縣。首先登城克之。六年。隨順承郡王勒克德渾。攻沅州。偽總兵三員。引賊衆萬餘拒敵。同鄂碩。擊敗之。又於道州路。

壺關。敗賊杜引喜二萬人。以功加授世職。爲一等阿達哈哈番。兼一拖沙喇哈番。九年。隨敬謹親王尼堪。征興州。偽安西王李定國。列象拒敵。同希布臣。對陣射之。象奔。遂大敗敵師。又敗偽秦王孫可望。兵於寶慶。後緣事削去世職。餘噶布什賢章京。兼牛录章京。尋陞燾章京。十年六月。從征貴州。敗偽帥馬進忠兵。又破偽帥姚黃兵。康熙二年。流賊李來亨。聚餘黨虜掠四川湖廣等處。科爾坤隨定西將軍圖海。靖西將軍穆禮瑪等。分路往勦。敗賊於長樂嶺。賊踞茅麓山。

因入山誘賊出。擊敗之。賊大隊來犯。復大敗之。李來亨乘夜劫營三次。俱擊敗之。賊駐上方坪。恃塘下寨軍糧。拒敵不降。因率師往絕賊糧道。大敗賊衆於石坪。斬賊將金騰雲。奪其寨。收南豐山。依檀家寨駐營。斷賊汲道。賊窘迫。於是賊首高必正。率僞侯僞將軍百餘員降。因會同大兵困茅麓山。仍斷賊糧道。賊首李來亨自縊死。餘賊俱降。毀其巢。以功授世職拖沙喇哈番。九年以疾卒。

賜祭葬如典禮。弟七十八。襲管佐領。康熙十四年。隨撫遠大將軍大學士圖海。征陝西。平定叛鎮王輔臣。又從將軍佛尼勒。平定四川。從順承郡王勒爾錦。克太平等處。俱有功。後以中傷歿。邁堪。滿洲正藍旗人。姓瓜爾佳氏。父曰丹穆布。邁堪早歲事

太宗文皇帝。小心無過。其妻葉赫勒氏。爲

世祖章皇帝乳媪。至順治四年。推恩給邁堪二等阿達哈哈番世職。累官散秩大臣。康熙十三年卒。

賜祭葬如典禮。諡勤慎。次子傳達禮。任三等侍衛。侍從世祖。亦忠勤謹恪。順治十八年正月。

世祖賓天。傳達禮卽捐軀以從。

特恩授世職一等阿達哈哈番。祭葬如典禮。諡忠貞。以

其長子和爾敦襲世職。

哈爾松阿。滿洲正藍旗人。姓鄂卓氏。世居輝發

地方。初任禮部叅政。天聰八年。奉

命往迎察哈爾歸附之衆。收五千戶而歸。又以出使土

默特功。授牛錄章京世職。崇德三年。更定官制。

改爲理事官。四年。隨曹海。薩穆什哈等。征撒哈

連烏喇。擊敗奔波果爾兵。五年。隨肅親王豪格

證明圍錦州。敗松山步兵。六年。復從大兵圍錦

州。敗明經畧洪承疇。二營步卒。又以督工屯田。

收獲加倍。加世職半個前程。順治四年。考滿稱

職。加授三等阿達哈哈番。遇七年

恩詔。加世職至二等。尋陞

盛京禮部侍郎。病卒。子桑圖。承襲世職。九年。連遇

恩詔。加至一等阿達哈哈番。兼一拖沙喇哈番。緣事削

去拖沙喇哈番。康熙三年。從定西將軍圖海。征

勦湖廣流寇。連敗賊兵於茅麓山下。仰攻茅山

門。與賊力戰陣亡。議卹加贈一拖沙喇哈番。以

其子沙克新襲。又桑圖弟阿翁岱之子阿蘇。以

七品監生隨征雲南有功。以疾卒於軍中。授拖沙喇哈番。以弟之子鄂通額襲職。

濟爾海。滿洲正藍旗人。姓民覺羅氏。世居忽野地方。以蒙古固山額真兼牛录章京。統兵征明。攻錦州。中火礮陣亡。

福格。滿洲正藍旗人。姓鈕祜祿氏。世居鈕祜祿地方。初克阿禮哈超哈。選授擺牙喇。順治五年。山西逆鎮姜瓖反。福格從征。攻汾州府。登城破之。授拖沙喇哈番。七年九年。三遇

恩詔。加至拜他喇布勒哈番。兼一拖沙喇哈番。官至副

都統。

黨古禮。滿洲正藍旗人。初任戶部筆帖式。陞他赤哈哈番。再陞本部員外郎。順治七年九年。三遇

恩詔。授拜他喇布勒哈番。十一年。從寧海大將軍固山

額真宜爾德。征偽魯王。攻浙江舟山。有偽英毅伯阮思等拒戰。同梅勒章京顧祿古擊敗之。又同署燾章京尼雅達。敗偽總制陳六御等三萬餘衆。獲船一隻。論功又加一拖沙喇哈番。凱旋陞兵部郎中。尋遷太僕寺卿。再陞內閣學士。旋

擢工部左侍郎。後調西安副都統。康熙三十年以疾卒。

參特赫滿洲正藍旗人。姓民覺羅氏。世居呼納河地方。初爲貝勒阿巴泰護衛。陞擺牙喇甲喇章京。順治元年。隨睿王多爾袞入山海關擊流寇有功。授世職半個前程。五年。任刑部郎中。七年九年。三遇。

恩詔。加世職至三等阿達哈哈番。十二年。擢正藍旗蒙古梅勒章京。康熙三年。陞鑲白旗護軍統領。以疾卒於任。

錫爾哈達滿洲正藍旗人。康熙十三年。以護軍校從征逆藩吳三桂。由陝西進四川。隨前鋒統領穆占。敗賊於小梅嶺。又敗賊於龍潭驛。十九年。隨征南大將軍賴塔。進兵雲南。征逆孽吳世璠。二十年。敗僞將軍何繼祖等於石門坎。又敗之於黃草壩。平定雲南。在事有功。授拜他喇布勒哈番世職。仕至副都統。

滿不。滿洲正藍旗人。姓覺羅氏。世居興凱地方。康熙四年。由監生授太常寺贊禮郎。十一年。陞理藩院主事。十四年。選授刑部員外郎。十九年。

陞監察御史二十一年兼管佐領事二十八年隨內大臣郎坦都統班達爾沙等往征雅克薩地方羅刹事竣還京從喜峰口進隨郎坦等至哨鹿所時滿丕聞有從虎虎城出兵之信卽向奏事端住等跪請曰臣滿丕蒙

聖主隆恩今當太平之世雖有効力之心亦無効力之地臣雖自雅克薩初回情願自此出征前往効力奉

旨滿丕從雅克薩來不必出征暫在行圍之處隨朕進京二十九年七月尚書吉爾塔布等領扎克薩兵在

烏爾會地方擊厄魯特

剛丹時

聖祖仁皇帝欲遣喇嘛商南多爾吉往噶爾丹軍營議事滿丕在議政王等前復叩頭請往奏入

特旨授理藩院郎中齋

詔旨馳驛前往滿丕隻身直進噶爾丹營次日噶爾丹跪領

聖旨筵宴相款敬禮有加滿丕乃持噶爾丹回奏本至古北口奏入稱

旨次日

召至御前指授方畧令滿丕帶領護軍叅領車克楚等

至克魯倫相近地方。令車克楚等往噶爾丹軍營議事。滿丕回來奏言。大兵離噶爾丹賊營相去百里。臣願在軍前勦滅賊寇。八月初一日。隨撫遠大將軍裕親王福全。遇賊於烏蘭布通地方。奮勇衝殺。大敗賊兵。得頭等功牌一。凱旋回京。三十年。陞內閣侍讀學士。明年。遷內閣學士兼禮部侍郎。三十二年。陞理藩院侍郎。奉

詔參贊內大臣伯費揚古軍務。并指授領兵方略。令傳諭費揚古等。九月奉

詔班師。三十三年四月。復奉

命參贊費揚古軍務。滿丕至軍前。與費揚古公議。令各處官兵在查木哈地方相連扎營。察哈爾官兵在後相繼接應。於圖喇等處地方探聽消息。至立秋後回兵。明年十月。復參贊費揚古軍務。受密旨。星夜馳至克魯倫地方。遵

聖諭各處訪問。拿獲在我處逃走衣拉吾克散胡土克圖。所遣徒弟索爾盤格隆等。送至理藩院。三十年。任議政大臣。二月。同撫遠大將軍費揚古。領官兵至昭莫多地方。與噶爾丹遇。排列官兵奮勇擊賊。矢石交加。滿丕隻身前進。射死賊首

八旗通志 卷一百六十六
阿奴等。又率兩藍旗兵。殺至特勒爾几谷口。登噶薩納山頂。豎立二旗。坐纛。至日暮。徹兵。大獲其子女。駱駝馬牛羊軍器等物。回兵至克魯倫相近地方。奉

聖祖詔。遣滿丕馳驛至虎虎城。查看兵丁有落後者。照看前來。滿丕因帶領喀爾喀官兵。駐於塔喇布拉克地方。時有投誠之厄魯特人等。俱相繼收留送京。論功授拖沙喇哈番。

賜夾衣一襲。明年七月。奉

詔回京。三十九年。奉

命往額黑阿拉爾地方。收服窮困厄魯特人等數百口。來歸。十二月。四川打箭爐番人蠢動。

聖祖特諭。前令副都統朱滿。率領荊州兵二千。往四川會同提督唐希舜行走。此處應差一大臣統領理藩院侍郎滿丕壯健。在軍前効力之人。應差前往。八旗新滿洲前鋒。共派二十四名。同滿丕前去。今馳驛帶子母礮四尊。至彼處。一應所騎馬匹糧米所用之物。俱著于養志。子于祿。預備供給。于養志乃犯罪之人。于養志本身。伊子于祿。俱著滿丕帶至軍前効力。于養志若不遲悞。能効力。免死。新滿洲前鋒。朕親身派

往滿不因星夜至打箭爐地方要害關口。自木雅啞
納溝至鴉隴江等處。量設官兵。安置塘哨。衆土
司所屬地方。俱宣諭。

聖主柔懷之德。至明年事平。十二月。滿丕代土司頭目
沈巴里。額魯七里等。奏請給與執照。言

聖主派出官兵。殺滅賊頭目。復取西爐地方。遠近番蠻。
俱重見天日。土司頭目沈巴里。額魯七里等。具
呈求給執照。查沈巴里祖。明時曾給土綱司印。
額魯七里。原係外土司頭目。俱傾心歸順。沈巴
里。應給巴地安撫司五品官職。額魯七里。應給

丹洞葛石。槎安撫司五品官職。俱給印信。又疏
稱木雅巴里。羅藏臨芹等。十五頭目。亦頂戴

聖恩。投順。應加鼓舞。俱授爲六品土司百戶官職。照常
分轄等語。事下議政大臣。覆稱。應如侍郎滿丕
所奏。俟

命下之日。應給印信字樣。該部照例鑄給。現今送來羅
藏臨芹等管轄地方四址。交界家口數目冊籍。
交與該部收貯。奉

旨。依議。事竣。還京。四十一年。陞正藍旗蒙古都統。四十
三年。以老乞休。

恩賜原品休致。

哈克山。滿洲正藍旗人。父法薩禮巴圖魯。任分得撥什庫。出征戰歿。哈克山其長子也。順治二年。由禮部筆帖式陞贊禮郎。再遷員外郎。十四年。改授護軍叅領。從征雲南及湖廣茅麓山。俱有功。康熙八年。陞本旗蒙古副都統。十二年。調滿洲副都統。尋陞本旗護軍統領。十四年。察哈爾布爾尼反。

聖祖命信郡王鄂扎爲撫遠大將軍。哈克山等叅贊軍務。協力征討。事平敘功。授三等阿達哈哈番世職。十六年復

命哈克山同副都統席三等。由江西進勦逆藩吳三桂。十七年正月。疏報官兵分路進勦。大敗賊帥韓大任於老虎洞等處。燒燬營寨。斬賊兵六千餘名。擒殺僞總兵副將等三百餘員。賊勢窮蹙。詣福建康親王傑書軍前投誠。六月。吳逆以大隊侵永興。犯我河外營。哈克山同都統伯宜里布率兵禦之。力戰俱歿於陣。

賜祭葬如典禮。諡武毅。超授世職一等阿達哈哈番兼一拖沙喇哈番。以弟之子巴爾泰承襲。哈克山

之弟巴克山者。初任護軍校。康熙十四年。從撫遠大將軍信郡王鄂扎征察哈爾布爾尼有功。十七年。從征雲南。戰於黃草壩。石門坎。桂花寺。及曲靖府等處。復有功。授拜他喇布勒哈番世職。

穆赫林。滿洲正藍旗人。姓博爾特氏。世居烏魯特地方。祖索諾木。原係烏魯特貝勒。率衆來歸。授二等昂邦章京世職。再傳至穆赫林。襲祖職。順治七年。九年。三遇

恩詔。加至三等伯。任副都統。康熙十四年。任議政大臣。

時逆藩耿精忠反。隨奉命大將軍康親王傑書。由浙江進征。正月二十五日。破僞都督林寵賊兵萬餘於仙居縣。焚其連營十三座。二月。敗僞都督錢司朱福賊兵四千。因以雲梯攻仙居。克其城。安撫居民。長驅直入。抵溫州。復五城。皆息民保境。九月。賊帥曾養性。率水陸兵三萬。拒戰於上塘嶺。同貝子傅拉塔。指授方畧。諸官兵力戰。敗之。十月。又同貝子傅拉塔。破曾養性舟師三十餘艘於南江路。始通。十二月。貝子傅拉塔。遣修溫州遶城河閘。僞總兵彭國明等。以五千

八旗通志 卷一百一十六
餘賊來犯。率所部官兵擊敗之。十五年二月十七日夜。賊帥曾養性。祖洪勳。犯我漢軍北營。率官兵沿江擊却之。是夜賊又犯江岸綠旗兵營。遣官兵往援。擊敗賊衆。曾養性。祖洪勳。整衆復戰。遣官兵往擊。自夜至曉。大破之。八月。敗偽將軍連登雲。劉清。於石塘嶺。焚賊營二十八座。十二月。進攻福建。連敗海寇吳素。楊大等。於延平府。克其木城。遂收復邵武汀州二府。併所屬十二縣。十六年九月。破海賊何祐於潮州府。復石井等處地方。後被海賊困於海澄縣。屢戰不獲。出。經圍數月。軍糧匱乏。與提督段應舉同時自盡。

哈占。滿洲正藍旗人。姓覺羅氏。世居葉赫地方。順治八年。由官生補工部筆帖式。十一年。陞本部。他赤。哈哈番。十三年。陞鴻臚寺序班。十八年。陞吏部員外郎。康熙二年。陞本部郎中。八年。調補督捕郎中。十月。陞秘書院學士兼禮部侍郎。十一月。修

世祖章皇帝實錄。克提調官。九年十月。改內三院爲殿閣銜。哈占。改中和殿學士。仍兼禮部侍郎。十一

年七月。

實錄告成。議敘加二級。食一品俸。九月陞工部左侍郎。

十二年九月奉

旨總督陝西等處地方軍務兼理糧餉。改兵部右侍郎

兼都察院右副都御史。仍食一品俸。十二月十

二日。至陝西受事。二十九日。聞逆藩吳三桂據

雲南反。即行令文武屬員。謹守汛地。安撫人心。

分派官兵。截守陽平寧羌。棋盤白土等關。並階

州文縣棧道要路。旋奉

聖祖仁皇帝諭陝西總督哈占。提督張勇。王輔臣等。逆

賊吳三桂。倘有偽札偽書。潛行煽惑。當曉諭官兵百

姓。令其舉首上聞。爾等皆朕擢任股肱之臣。扞禦邊

疆。綏輯軍民。惟爾等是賴。其悉知朕意。哈占正在預

防。而四川巡撫及提鎮等官。盡叛降於賊。因分

遣官兵。防守川陝接壤關隘。十三年正月奉

聖祖諭。令副都統科爾坤。領兵將往西安。俟將軍赫業

等至漢中。與將軍瓦爾喀。同進四川。如漢中必須守

衛。爾同科爾坤。與西安副都統酌議以行。三月。四川

降逆兵萬餘。私襲陽平關。哈占令興安綠旗官

兵。會同八旗兵。恢復陽平關。並復三寨。斬獲甚

衆。又行催所調各營汛綠旗官兵。作速進發。會同八旗兵。恢復朝天關。廣元等處。哈占又以賊詭計。必乘虛分道入犯。嚴飭各汛。密加防守。川賊果由玉都路侵犯。有先差防守之遊擊陳福良。伏兵擊之。大敗。官兵進川。馬匹有疲瘦者。哈占採買補給。至需用糧草。由漢中廣元運送。山路險峻。程途遙遠。因造船由畧陽乘運。接濟。又檄借山西穀二十萬石。協濟軍糧。十月。疏報四川賊衆。先立營於寧羗州文廟山。叅將陳應奎等。鼓勵士卒。夜襲賊營。賊衆大亂。遁回南山。十一

二月。疏報經畧莫洛標下中軍官吳石珊。自棧道逃回云。經畧駐兵寧羗州南教場。本月初四日。王輔臣標兵猝叛。攻其營。經畧親隨滿兵。併力射却之。既而王輔臣身自督戰。礮矢齊發。經畧莫洛中鳥鎗死。初七日。王輔臣率叛兵至沔縣。欲犯貝勒董額營。值標下兵五百。及各處運糧兵二千餘。一時星散。王輔臣勢孤。始回畧陽。時寧羗兵猝變。各處騷動。哈占隨行。令提督總兵官等同心協力。固守邊疆。激勸官兵。共除逆叛。而秦州平涼二路阻絕。慶陽一府復叛。西北

一隅。信息不通。哈占於各處隘口。設立官兵。教以戰守之法。旋聞賊軍圍漢中。惟城谷陽縣至河水峪。山徑可通。哈占於河水峪至山河口。設甲兵立臺站。護送糧草。以濟漢中。十四年正月癸酉奉

聖祖諭。據爾等奏稱。王輔臣兵變。致經畧標下兵。綠旗兵丁。並驚潰等語。朕思秦省兵士。舊在行伍者。戍守著勞。新行招募者。驟經調遣。今俱隨征遠出。深軫朕懷。事出意外。必非無因。念其變出倉猝。情非得已。未忍加誅。爾等卽宣諭朕意。速行招撫。願歸營者。隨便入伍。願歸農者。加意安插。前罪一槩不究。其官兵人等。父母妻子。現在原籍者。俱行宥釋。並不株連。念伊等皆朕赤子。特布寬典。予以自新。勿得執迷不悟。自貽伊戚。爾等卽廣行曉諭。以副朕撫綏招徠之意。哈占極力招諭。兵丁漸次來歸。正月。與貝勒董額同奉

聖祖諭。王輔臣雖具疏悔罪。正恐借此以緩我師。乘間爲固守計。若王輔臣果聽命待罪。我兵但守疆界。倘或揚言投誠。而仍肆擾害。勢將蔓延。爾等卽相機勦禦。會蒲城縣土賊擄掠地方。哈占授遊擊。田有禾計

八旗通志 卷一百六十六
往勦。適興安兵又變。殺總兵官王懷仁。哈占仍多方安撫。出

聖祖頒發勅諭。宣諭官兵。眾乃歡呼踴躍。感激叩謝。人心始定。時川賊乘興安之變。率眾三千。暗襲漢陰。哈占先時所遣防守之遊擊錢應龍。在彼截殺。遂復漢陰。二月。賊犯蘭州。撫標官兵。應賊倡亂。城陷。巡撫華善奔涼州。慶陽賊兵亦侵犯三元縣。都在寨。哈占遣遊擊偏圖。焦應善領兵拒截。斬獲甚眾。未幾。神道嶺遊擊李世英又反。殺韓城縣知縣翟士奇。率領土賊六千。據守六口。

哈占所遣遊擊田有禾往勦蒲城土。而李世英賊眾。適在邠陽。擄掠華村地方。田有禾等官兵驟至。斬賊一百三十餘級。生擒三十七名。蒲城土賊。旋亦敗亡。其黨悉平。三月。遣遊擊邵一仁。擊敗川賊於興安鎮。屬之紫陽路。時叛鎮王輔臣。遣賊陷定邊城。

聖祖特諭哈占。速發官兵赴寧夏。同總兵官陳福并力進取。是月丙戌。哈占疏報。慶陽賊攻邠州梁家堡。固原總兵官朱衣客擊却之。斬偽參將吳進忠等。下部議敘。哈占又行令遊擊田有禾。帶領官兵。

征勦韓城李世英。預令延安營叅將李忠、宜津營叅將楊宗道密圍截殺。四月，賊兵犯羅川。楊宗道領兵適遇賊，擊之，斬首二十餘級，賊敗走。五月甲子，疏報慶陽逆賊攻入三水縣，知縣林逢泰并印信俱被劫，防守把總趙英同四川督標隨征都司張虎臣率領民兵擊敗逆寇，救回縣令印信，保全倉庫人民。下部議敘。五月甲戌，疏報慶陽賊眾突圍長安縣城，欲劫運送涇州糧米。遊擊許靖國等督率民兵保全城池。固原總兵官朱衣客、副都統覺夸代統兵救援。滿漢

大兵前後截殺，逆賊大敗，生擒偽副將南文炳。是月有逆賊朱龍者，糾眾騷擾定邊、花馬池一帶地方，攻陷甘泉縣。叛將李世英又攻陷延安府。哈占咨行延綏鎮總兵官許占魁、寧夏提督陳福兩路夾攻之。又疏報固原鎮標遊擊趙元輔等率兵赴寧州，屢敗賊於東河灘、焦家坑等處。叅將楊宗道敗賊於甘泉，恢復縣城。又鳳縣賊眾勾引川賊侵犯寶雞縣之盤棋宮、天王村。滿漢官兵疾趨進勦，賊大敗，擒偽總兵劉偶三、斬偽都司李玉國等。下部議敘。是時臨洮鞏昌

甘州涼州寧夏等處。路絕不通。哈占移咨蒙古地方。差人會甘肅西寧提督總兵官。並寧夏提督陳福等。作速合戰。又以路絕日久。糧餉不濟。卽於彼處勸諭捐助米穀。並向富戶支借銀兩。以濟軍實。官兵攻延安。賊衆堅守不下。哈占遣守備朱貴等。前赴延安。協力攻擊。又密令楊宗道等。扮鄉民前往平逆將軍畢力克圖處。密約日期。齊至延安。協力攻之。七月。疏報將軍畢力克圖。統兵會勦延安賊兵。賊兵逃遁。恢復延安府城。自是軍勢始張。白羅睿木靖邊花馬池定邊等處。漸次恢復。秦州賊衆。亦於六月內投誠。是月。疏報興安遊擊王可成等復叛。總兵官黨塞。及道臣興永朝。奔赴西安。請移潼關綠旗兵守商州。遣臣標綠旗兵守舊縣關。及子午太乙二谷。分撥省城滿洲兵守潼關。總督鄂善巡撫張德地。停赴延安。留守省城。得

音。先因將軍畢力克圖。自延安往會將軍阿密達軍前。延安等新復之地。安撫殘黎。保固疆土。事極緊要。故遣鄂善速往。今省城現有副都統德業立等兵。鄂善等至今未行。殊屬不合。諭到。仍著鄂善等速赴延安。

興安旣叛。潼關要地。應檄駐太原將軍吳丹。分兵赴潼關。同夸蘭大鄂爾博什固守。餘悉如議。八月。疏言前聞將軍席卜臣等。兵出漢中。屯洋縣。隨遣人偵探。今據報。席卜臣果離漢中。但不知歸自何路。已知會大將軍貝勒等。一面檄將軍佛尼勒。停止進兵。奉

聖祖諭。令佛尼勒分兵六百。與駐守寶雞副都統阿爾祜兵。共爲一軍。令阿爾祜統轄。嚴防棧道諸險要。餘著佛尼勒鄂泰領至西安。如得席卜臣等歸路確信。卽以兵往迎。大將軍貝勒董額等。現統大兵駐秦省。作何接應。席卜臣等。與總督哈占籌度以行。尋疏言興安叛兵。已與蜀寇合併。攻陷舊縣關。將逼西安。南山羣盜。又分出各口。乞

勅大將軍貝勒董額將軍畢力克圖等。速發兵救援。見駐河南副都統龔圖亦乞遣至。

聖祖切責之曰。始王輔臣叛。朕以蘭州要地。關係三邊。令哈占發兵鎮守。哈占稱西安要地。不便分兵。致蘭州諸處淪陷。三邊搖動。繼哈占復以西安要地。屢疏請兵。因將荊州大兵。陸續調赴西安。遂致荊州彝陵。兵力單弱。又延安爲諸路要衝。曾命鄂善周有德等。

駐防。哈占又奏鄂善等兵少。留之西安。致延安陷沒。哈占封疆大臣。每當議事。不一體籌畫。但於己身所在。常欲重兵自衛。不求速定地方。貽悞匪小。今又稱叛兵與蜀寇合。欲分諸將軍兵。悉赴西安。是哈占但知有西安。置他處於度外矣。且蜀寇何能便與興安叛兵合。卽至西安。不過因諸將齊赴平涼。故爲聲揚。以亂我軍心。分我兵勢耳。諸將當益急攻平涼。勿得稍緩。王輔臣未滅。西安潼關。亦宜增兵勦禦。近理藩院郎中胡什巴。調蒙古兵赴太原。將軍吳丹。可率所部兵速赴潼關。與根持鄂爾博什等協守。又蒙古鄂爾多斯土默特兵。見駐榆林。著理藩院員外郎拉篤祜率此二部兵。速赴西安。若鄂爾多斯兵。必不可行。卽留與總兵官許占魁等駐防榆林。是月。疏報招撫朱龍脅從僞文武官六十餘員。民人二萬三千有零。下部議敘。九月。逆賊董環等糾約僞遊擊潘英等。率衆二千。出口侵犯。哈占密令將弁地藏保等。分軍夾擊。大敗之。十月。疏報寶雞地方。有李冉二姓僞總兵官。由棧道出口。於九龍山上。扎立三營。叅贊軍務副都統鄂泰。署副都統阿爾祜等。卽調八旗官兵。星夜奮擊。大殲賊兵。

又疏報賊黨王屏藩等犯秦州。是月奉

聖祖諭。同將軍席卜臣等。將還自漢中之兵。簡精銳者守大峪口。尋又疏報慶陽一郡官兵士民。先雖被脅從逆。今原任知府王文紳守備路調鼎等。經臣招撫。卽率衆獻城歸順。并擒僞總兵南一元等。安插士民三萬餘人。十一月疏報。十月二十三。日副都統鄂泰等。敗賊於益門鎮。招撫僞總兵任德旺等。十二月疏報。候補遊擊梁鼐。敗賊於漢中。十五年二月疏報。寧夏與鄂爾多斯接壤。今乘內地有事。蒙古入邊。侵掠寧花寨平羗等

堡

聖祖命理藩院郎中額業圖。爲署副都統。馳驛赴鄂爾多斯。曉諭其王貝勒等。令其嚴禁。仍令整兵以俟。調遣時。華州南山內有賊首聚衆擾亂。依恃山峻。擾害地方。屢遣官兵往勦。不能盡除。六月。哈占遣撫標中軍遊擊劉士良往勦。授以先撫後殺機宜。給招安告示。並免死牌。士良至南山。出示宣諭。賊將盡散。黨羽投降。數月之間。陸續招安僞官一百八十三員。兵三千九百九十八名。安撫亂民八萬八千餘衆。九月疏報。商州叅

將拜思哈。恢復山陽縣。十七年。會同撫遠大將軍都統大學士公圖海。進取漢中興安。規定四川。十八年六月。益門鎮口南山高處。有僞將軍陳君極。帶領僞總兵數員。賊兵萬餘。排列火礮等器出戰。哈占率衆進戰。大破賊兵。十月二十一日。僞總兵王遇隆。領賊兵拒守兩河關。哈占帶領官兵。渡御乾河潯河。與賊力戰。自午至申。大破賊兵。復兩河關。二十八日。進征興安州。僞將軍韓晉卿遁。僞總兵王永石。率衆獻興安城降。十一月。奉

諭旨。同將軍吳丹。統兵後應。併督運致糧餉。策應進川官兵。十九年閏八月。奉

諭旨。簡本標精銳。馳赴永寧。會吳丹軍。凡綠旗兵。俱令哈占統轄。同心協力。進定雲南。九月。復奉

諭旨。由保寧江直進。破譚洪。先是四川俱爲賊兵所據。至是漸次平定。十一月。奉

命。仍總督川陝。時四川逆賊譚洪。譚天密。彭時亨等。俱係吳逆授爲僞將軍。尚據川東川北一帶地方。僞將軍馬寶等。據守遵義府。欲與譚洪等合兵作亂。是月。哈占疏報。臣於十月廿四日。已抵保

寧。一面酌撥官兵防守昭化蒼溪諸隘。一面揀選精銳。付總兵高孟。一路由順慶達州進取營山。一路由南部進取營山。復由營山會取渠縣。俟勦滅逆賊彭時亨。平定川北之後。再進勦川東逆賊譚洪。得

旨。保寧關係重要。總督哈占。暫駐鎮守。俟將軍王進寶到日。哈占卽率大兵勦譚彭二賊。哈占隨領綠旗官兵。星夜進發。以總兵官高孟。副將郝徹白等。分爲十三路進勦。遇賊史官才。張嘉贊。據守南溪橋。官兵奮勇殺入。大破賊兵。生擒三千餘人。追殺三百餘里。復營山縣。僞將軍彭時亨等。敗走羅石橋。渡河拆橋。據岸固守。哈占率領官兵。奮勇渡河。斬首一千四百餘級。生擒二百一十三人。餘賊遁入梁濟寨。哈占調撥官兵圍之。遣副將祈徹白等。分兵五路。奪其險隘。又遣總兵官高孟。叅將王宣懿等。領兵四面攻之。賊兵出戰。生擒僞總兵魏仰武。叅將徐之器等。斬首一千餘級。僞將軍董清芳。乃率衆降。捷

聞。並下部議敘。是月。又揀選精銳。進勦渠縣牛角石地方。賊衆據守山巖險路。掘壕排柵。火礮如雨。哈

占遣總兵官高孟。副將祈徹白等。領兵分爲六路。填壕砍柵。大破賊兵。斬首七百餘級。次日追至渠縣。彭時亨率衆拒敵。官兵與戰。自午至申。奮勇直入。斬關奪門。恢復渠縣。彭時亨等敗遁。追至小梁城敖山地方。有僞吳總兵。帶領賊兵。據守山岡。哈占遣總兵官高孟等。五路進剿。斬首三百餘級。生擒三十六人。遂進兵至霸橋廟。有僞姚將軍與僞吳總兵等。領賊兵三千拒守。官兵奮勇齊入。攻破賊營。斬首一千餘級。生擒三百一十五人。恢復廣安州城。俱具疏上。

聞十二月庚寅奉

諭旨。大將軍固山貝子章泰等。已平貴州。進取雲南。大將軍賴塔。已統率大兵進發。總督哈占。可速勦滅逆賊譚洪彭時亨等。卽遵前旨。同滿漢大兵進討。哈占既追彭時亨至太平寨。有僞總兵夏之梁等。領賊萬餘。立六營守大鐵山關。又有僞總兵蔣尹高等。領賊六千餘。立四營守小鐵山關。哈占遣總兵官高孟等。分軍十路。指揮直入。破賊四營。斬獲賊衆二千四百有餘。恢復鐵山關。又恢復達州城。隨追殺餘賊。至梁鳳峽地方。有尤陳二

姓偽總兵。率兵拒守。哈占調撥官兵。合圍山谷。斬首三百餘級。生擒六十餘人。斬偽守備二名。又追至倒馬坎。有偽吳總兵。領賊數千餘。據守木城。官兵力戰破城。斬首五百餘級。生擒一百十四人。又斬偽遊擊都司守備四名。復追至廟場地方。擊敗偽將軍。斬首一千餘級。生擒五十人。斬偽參將遊擊守備萬名聲等六名。又有偽總兵率眾拒守射蒲山。哈占遣總兵高孟等分軍六路進剿。斬獲賊眾一千三百有奇。賊敗遁。恢復大竹縣城。二十年正月初三日。偽總兵李正國率賊兵四千。據河拒守東鄉縣城。官兵力戰。自己至申。賊眾大敗。爭先入城。官兵追之。奪門入。斬首一千六百餘級。生擒二百餘人。恢復東鄉縣。是月奉

諭旨。譚洪黨羽俱已就戮。萬縣諸地悉經收復。總督哈

占可率所屬兵馳赴敘州府。與大兵協力前驅。勦賊。初六日。哈占遣總兵官高孟進兵。至月城寨地方。賊首彭時亨等率眾數千逆戰。又暗伏賊兵萬餘。分路襲擊。官兵奮不顧身。自午至申。陣斬偽總兵副將遊擊守備吳達等十三名。殺賊兵

二千餘級。生擒一百七十三人。捷

聞。並下部議敘。尋彭時亨、譚天密等與賊將數員勢窮力竭。陸續來降。兩川悉平。五月。疏言臣發兵永寧。由赤水畢節追勦逆賊馬寶。進攻雲南。但兵力少弱。而永寧新復。壤接貴州。土司雜處。請

勅固原總兵官王用予率兵爲臣後應得。

旨。著王用予率所部兵馳赴永寧固守。哈占旋進兵往勦雲貴。抵貴州威寧。奉

旨。雲南兵已足用。哈占可率兵還四川。駐守要地。兼顧川陝。先是哈占曾緣事革職。十一月。以哈占率兵進

勦。直抵雲貴。勞績茂著。復其原官。二十二年二月。復以平定兩川功。加二級紀錄。四次。兼兵部尚書職銜。八月。內陞兵部尚書。回京時。疏陳川陝善後事宜。言潼關商州神道嶺金瑣關四營。向屬慶陽協管轄。途路寫遠。一切緊急軍務必致遲悞。請將神道嶺等營。令潼關營管轄。聽固原鎮總轄。至富平營分防六縣。汎廣兵單。將郿縣營兵五百名內。撥馬兵五十名。守兵五十名。給富平營防禦。

詔從所請。二十四年四月。轉禮部尚書。二十五年七月。

奉

旨差往口外。八月卒於喀爾沁道中。年五十五歲。

西伯滿洲正藍旗人。姓舒舒瓜爾嘉氏。世居嘉通阿地方。康熙十四年。由護軍從征陝西叛鎮。王輔臣。充前鋒破敵。首先殺入敵陣。身被重創。奮勇力戰。賊據虎山墩。我兵以智取之。賊勢大窘。遂獻城以降。敘功列頭等。得賞銀五十兩。又隨大兵進取雲南。師次洞庭湖。有賊來犯西伯。奮勇擊敗之。復大戰於君山岳州等處。所至有功。又與賊遇於雙井鋪。轉戰二晝夜。敵遁走。旋

克武崗州。大戰於風摩嶺。拉雞鋪。進至黃草壩。遇敵擊敗之。直至雲南桂花寺。以第二隊殺入。攻破賊壘。敘功爲二等。得賞銀四十兩。屢官典儀。至前鋒侍衛叅領。二十四年。厄魯特噶爾丹謀叛。

聖祖仁皇帝親統六師。聲罪致討。西伯復隨大兵征之。王師所至。立奏膚功。西伯並在事有功。六十一年。授左翼步軍總尉。雍正二年。加副都統銜。

賜孔雀翎。三年二月。初設寧夏滿兵駐防。特授西伯爲鎮守寧夏將軍。率領官兵前往駐防。七年

特旨加太子少保。本年十一月。內大臣佛倫轉傳

諭旨。西伯征勦南省。頗著勤勞。現今大臣中與伊相似者甚少。而伊復於軍前衝鋒陷陣。得有傷痕。簡任將軍以來。將彼處兵丁。訓誡約束。盡職効力。可爲將軍中特出之人。伊係軍前勞績茂著舊人。著賞給世襲。拜他喇布勒哈番。八年十月。以疾卒於任。靈柩進京。

奉

旨著左翼四旗大臣往弔。復派散秩大臣一員。帶侍衛十員。齎茶酒往奠。

賜銀一千兩治喪。得全葬典禮。

賜諡襄壯。立碑墓道以旌之。其文曰。朕惟功資保障。書

茂績於旂常。望重干城。錫嘉名於琬琰。宣力冠赳。桓

之旅。寵命頻頒。厚終增存。歿之榮。彝章特煥。用弘國

典。式勵臣謨。爾西伯秉質樸誠。持衷恪謹。備員虎衛。

常依日月之光。擢職龍驤。克奮風雲之烈。奏烽消於

南省。矢石躬親。膺闔寄於西陲。旌幢氣肅。兵民共協。

洵撫輯之多方。邊徼枚寧。實勲庸之偉著。爰再延其

世爵。裕後彌長。庶永享夫遐齡。勲猷益勸。何期疢疾。

遽悼淪殂。給內帑以營喪。命禮官而定諡。既申奠醊。

八旗通志 卷一百六十七
復賁絲綸於戲。碑勒黃墟。炳耀壯松楸之色。名垂青史。褒嘉彰節鉞之徽。荷此隆施。昭茲來許。

八旗通志初集卷之一百六十七

名臣列傳二十七

鑲藍旗滿洲世職大臣一

碩翁科洛巴圖魯安費揚武 子阿爾岱 爾岱 敦兌 達

孫赫色

孫塔

馬錫泰

杜爾德

穆克譚巴圖魯

子艾音塔木 那桑阿 孫公圖

吳巴海

喀山 子納海

舒賽

子西蘭 孫席 特庫 沙爾虎達

巴海

族人達爾珠 戴察 朱什里

碩翁科洛巴圖魯滿洲鑲藍旗人。姓覺爾察氏。本名安費揚武。世居瑚濟寨地方。其父完布祿章京事。

太祖高皇帝有章甲尼麻喇人誘令謀叛不從。又劫其孫以要之。終無二志。安費揚武克繼父志。自弱冠從。

太祖四征不庭。竭誠效力。撒爾湖城長諾米納兄弟與尼堪外蘭通謀。安費揚武從。

太祖往討。率衆擊諾米納兄弟及其軍士盡殲之。兆嘉城長李岱導哈達兵三百人劫湖濟寨而去。碩

翁科洛巴圖魯適出獵歸。卽率所領十三人追及之。敗哈達兵。殺四十人。盡奪所掠子女以歸。尋從大兵取嘉兆城。身先奮戰。李古里札秦走附江上之汪泰。安費揚武奉

命往招。並汪泰降之。尋同大兵攻取馬兒墩寨。戰三日。皆爲軍前鋒。又統兵征哲陳部。乘夜攻拔其城。城長阿爾泰竄走。追斬之。又攻洞城。及王甲章甲尼麻喇。赫徹穆等城。皆著功績。又率兵取香潭寨。寨長李敦拜湖遁。追及於碩郭之陽。擒之。從畧哈達富兒家齊寨。師還。敵兵來追。

太祖親殿後。賊兵突前掩至。

太祖方迎射前一騎。後三騎乘間揮刀來犯。安費揚武截擊盡斬之。癸巳年九月。葉赫等九國合兵來侵。安費揚武隨大兵奮戰破敵。九國敗走。己亥年。從大兵攻哈達城。先登拔之。十月。訥殷路搜穩塞克什。聚七寨人。據佛多和山寨而居。閏十一月。奉

命同額亦都巴圖魯噶蓋扎爾固齊督兵千人往征之。圍其寨三月乃下。斬搜穩塞克什而歸。辛亥年。同阿巴泰台吉等率兵一千。征東海兀集部之

烏爾古宸木倫。二路取之。戊申年。從征烏喇。敗敵有功。十二月。

太祖特命與費英東。扎爾固齊。額亦都巴圖魯。達爾漢。轄。何和理。額駙。同爲五大臣。癸丑年春正月。從太祖親征烏喇。安費揚武擊達拉木台吉兵。摧其陣。奮勇登城。先樹大燾於城門之上。大兵繼至。遂滅烏喇。天命元年七月。同達爾漢。轄。征薩哈連部。至兀爾簡河。水陸並進。取河南河北諸寨。凡三十有六。八月。兵至黑龍江南岸。其江每歲九月始冰。是日。見江水結冰橋一道。寬二里許。引兵

渡之。遂取薩哈連部內十一寨。及回兵時。冰橋已解。其西偏復結冰一道如前。咸驚爲天助焉。又降使犬諸路長四十人。始班師。四年。大兵攻明取撫順。安費揚武率衆先擊。破其左營。援兵。又與額亦都巴圖魯。攻馬根單。花豹衝。三岔兒堡。下之。安費揚武秉性貞亮。有勇畧。自癸未年。來歸。卽從征伐。開國功臣。惟安費揚武與額亦都二人。效力最在先。並以早歲行兵。迄於白首。戰輒居前。還則殿後。屢受重傷。多樹勲伐。

太祖嘉安費揚武功。賜名碩翁科洛巴圖魯。猶漢言鷲

勇云。官至固山額真。天命七年卒。年六十四。

世祖章皇帝順治十六年三月。追諡敏壯。建碑墓道。

賜阿達哈哈番世職。令其子席爾岱。達爾岱。分襲。康熙

三十七年。

聖祖仁皇帝謁

陵至盛京。特遣大臣往奠墓次。後其孫襲職時。所司以

例議裁其

恩詔所加官。

聖祖追念碩翁科洛巴圖魯為開國勲臣。不允裁減。令

兼襲焉。子八人。長碩爾輝。在十六章京之例。第

四子阿爾岱。初任牛金。章京。天命六年。駐防耀

州。有明兵來犯。率眾列陣拒戰。擊敗其軍。屢從

征伐。論功授備禦世職。天聰五年。從征明大凌

河。城內敵兵突出。身先眾兵奮勇衝殺。遂歿於

陣。從優卹贈。加世職為三等甲喇章京。第六子

達爾岱。初任擺牙喇甲喇章京。天聰五年。從征

明大凌河。往守臧家堡臺。遇敵兵百人突走。追

殺十四人。崇德元年。隨

太宗文皇帝親征朝鮮。我蒙古兵前往納馬山牧馬。敵

兵橫截來戰。達爾岱奮擊敗之。殺四十餘人。擒

六人尋率兵步進。連破敵營二座。三年八月。隨揚威大將軍貝勒岳托。征明。往北京埋伏。遇明馬兵數百。同勞薩碩翁科洛巴圖魯。擊敵有功。六年三月。我師征明。圍錦州。有松山兵來犯我。紅衣礮。率擺牙喇兵奮擊。退敵。敵兵乘雨後。侵我右翼汛地。偕衆往援。力敗其軍。又錦州城敵兵出戰。同肅章京德爾德赫領兵接戰。却之。併敗其採樵步兵。八年九月。隨鄭親王濟爾哈朗。征明寧遠。敵兵出城拒戰。領肅前進。敗之。順治二年正月。敘功授半個前程。世職。七年遇。

恩詔。追念伊父碩翁科洛巴圖魯之功。超加爲三等阿達哈哈番。九年遇二次。

恩詔。加至一等阿達哈哈番。第七子敦兌。初任噶布什賢章京。順治元年四月。隨睿王多爾袞入山海關。遇流賊僞總兵唐通。兵數千。同噶喇昂邦。席特庫率衆掩殺。敗之。又追流賊至安肅縣。生擒哨騎三人。又隨固山額真譚泰率兵長驅北逐流賊。殪其步卒。二年正月。敘功授半個前程。世職。六年。任擺牙喇甲喇章京。七年九年。三遇。

恩詔。屢加至三等阿達哈哈番。康熙元年卒。兄子赫色。

襲二十年三月。赫色隨征南大將軍都統賴塔。由廣西進雲南。征逆孽吳世璠。破黃草壩地方。直至雲南城。同三路大兵。平定雲南。二十五年。議敘。加授世職爲二等阿達哈哈番。

孫塔碩翁科洛巴圖魯安費揚武長子。碩爾輝之次子也。天聰八年五月。以其供事勤慎。授牛录章京世職。崇德三年八月。隨揚威大將軍貝勒岳托。征明山東。遇廬軍門兵。奮勇進擊。敗敵者三。我師出邊時。明兵尾後襲追。孫塔同圖賴等。回兵接戰。敵乃退。明兵復乘間奪我喀喇沁

兵所駐山巔。孫塔同圖燕圖。率兵往援。擊敗敵衆。六年八月。大兵再圍錦州。孫塔同梅勒章京藍拜。連破明經畧洪承疇三營兵。敵人乘雨後來犯我右翼汛地。復同梅勒章京藍拜。步戰却之。八年十月。管甲喇章京事。順治元年四月。隨睿王多爾袞。進山海關。擊流賊有功。二年正月。議敘。授世職爲三等甲喇章京。三年正月。隨靖遠大將軍肅親王豪格。征四川。至漢中府。擊賊首何進。同尙書覺羅巴哈納。敗之。至西充。賊渠八大王張獻忠。親率兵拒敵。孫塔同梅勒章京

席特庫奮勇前擊。連破敵營。我軍至南陽。賊帥郝總兵來拒。同固山額真墨爾根轄擊走之。尋奉

命戍守淮安。有賊攻破海州城。旋遁去。孫塔率兵追至

馬奇山及之。賊扎寨拒敵。孫塔陣斬賊渠曹良臣。盡殲餘黨。五年八月。任刑部理事官。六年十月。陞戶部侍郎。管理鹽法。駐劄揚州。七年正月。

遇

恩詔。加世職為一等阿達哈哈番。五月。總理漕儲。九年。

遇二次

恩詔。加世職為三等阿思哈尼哈番。回京。補本旗梅勒

章京。尋陞工部尚書。十三年九月。考滿。廕一子

入監讀書。十五年三月。監修

上帝壇

奉先殿。工成議敘。加世職為二等阿思哈尼哈番。八月。

遷蒙古固山額真。十七年二月。遵

諭自陳。解尚書任。專管固山額真事。十八年十二月。同

定西將軍公愛星阿。統大兵抵緬甸阿娃城。獲

偽桂王朱由榔有功。康熙三年議敘。優加世職

為一等阿思哈尼哈番。又兼一拖沙喇哈番。四

予祭葬如典禮。諡忠襄。

年五月。轉本旗滿洲都統。十二月以疾卒。

馬錫泰。孫塔子也。康熙五年正月。襲伊父一等阿思哈尼哈番。又兼一拖沙喇哈番。任前鋒叅領。十四年三月。隨撫遠大將軍多羅信郡王鄂扎。征察哈爾布爾尼。至大魯地方。敗賊。乘勝過山。勦殺。又敗其山溝伏兵。察哈爾布爾尼聚殘兵來戰。復連敗之。四月凱旋。加世職爲三等精奇尼哈番。十六年。從征逆藩吳三桂。四月。率兵赴吉安。十七年五月。陞本旗蒙古副都統。十八

年十二月。轉本旗滿洲副都統。十九年六月。隨鎮南將軍莽依圖。由廣西進勦逆孽吳世璠。至賓州陶屯地方。敗僞將軍范齊韓詹仰等。二十年正月。隨征南大將軍賴塔。奪石門坎。破黃草壩。直至雲南城下。同三路大兵平定雲南。七月。同都統希佛。率兵往楚雄。追賊帥馬寶巴。養元。至烏木山。降其衆。二十五年。敘功。加授世職爲一等精奇尼哈番。三十年四月。以老病致仕。

杜爾德碩翁科洛巴圖魯第四子阿爾岱之子也。天聰八年。襲伊父三等甲喇章京世職。順治

元年正月。任刑部理事官。四月。隨睿王多爾袞進山海關。同燾章京德爾德赫。破流賊有功。十月。隨定國大將軍豫親王多鐸南征。由河南進至潼關。流賊駐立山頭。杜爾德擊敗其衆。回兵時賊兵來追。率擺牙喇兵殿後截戰。賊衆乃奔。明日率我兵潛伏潼關。擊敗流賊數千。又擊流賊第二營步兵克之。二年正月敘功。優加世職。爲二等甲喇章京。三月。隨豫親王多鐸往定河南。有賊將劉方亮率兵千餘來窺我營。杜爾德同敦拜率擺牙喇兵往擊。大獲全勝。五月。同宗

室韓岱等率師至揚州城北。破敵兵。獲船百餘艘。隨大兵追明僞福王至蕪湖。福王登舟欲渡江。隨固山額真公圖賴等截其去路。擊敗僞靖國公黃得功。三年五月。加授世職爲一等甲喇章京。十一月。隨征南大將軍多羅貝勒博洛進征福建。同噶布什賢章京伊拜等攻下建寧。延平等府。僞唐王朱聿劍遁走汀州。復隨阿濟格尼堪等率兵追襲。直抵城下。擒斬聿劍。及僞曲陽王朱盛度。並僞官僞伯等。遂定汀州。五年二月。陞本固山燾章京。是年隨定遠大將軍鄭親

王濟爾哈朗征湖廣流賊。六年十二月。賊渠王強犯沅州。杜爾德同阿哈尼堪破之。斬偽副將三人。賊兵七百餘級。獲馬七千餘匹。七年遇

恩詔。加一拖沙喇哈番。八年七月。任議政大臣。九年遇二次

恩詔。加世職至一等阿思哈尼哈番。康熙三年七月卒。予祭葬如典禮。諡忠襄。

穆克譚。巴圖魯。滿洲鑲藍旗人。姓戴佳氏。世居哈達之杭濶地方。

太祖高皇帝未滅哈達時。隨父率衆來歸。始編牛衆。令其管轄。每從征伐。所至前驅。屢建奇績。諸將中。孟庫之父曰查海胡色者。叛之。哈達。穆克譚同父暨四兄追之。父兄俱歿於陣。穆克譚從子厄爾諾亦叛歸哈達。穆克譚隻身往追。殺之。天命元年。我師往瓦爾喀。舒賽。阿爾虎達。進戰。孟庫。噶哈。二人輒先敗走。我兵先進戰者三人死焉。穆克譚怒。奮不顧身。同燕布理等八人直衝入陣。賊衆披靡。舒賽。阿爾虎達。得以身免。師還。

太祖治孟庫噶哈罪。盡奪其所獲。賜穆克譚。天命六年二月。從征明耀州。穆克譚先登。克其城。尋奉

命駐防耀州。有蒙古人叛去。我兵十九人追及之。與戰不利。穆克譚獨奮勇直前。策馬衝突。大呼曰。穆克譚至矣。鎗刺首逃者。海色餘皆潰。敘功。授二等副將世職。十一年八月。

太宗文皇帝御極。擢置十六大臣之列。出治戎兵。入理詞訟。天聰元年四月。隨大貝勒阿敏。濟爾哈朗。征朝鮮。凱旋。以二次登城功。賞人馬各八。六月。阿山。阿達海等。自謂奇男子。有才不得錄用。叛往歸明。大貝勒阿敏乘夜追及。射殺其二子。阿山亦被創。兄弟潰散。穆克譚單身追射阿達海。

阿達海接戰。刀砍穆克譚墜馬。幾死。遂得重傷。五年八月。從征明大凌河。隨固山額真篇古阿格。圍錦州。我師四面進戰。穆克譚以本旗兵。徑抵城壕。舍騎步戰。迫敵入壕。敵壕岸兵。與城上兵。礮矢齊發。我兵不得進。城內敵兵復出。並力拒戰。穆克譚身先衆兵。奮勇擊敵。遂歿於陣。

太宗聞之。歎曰。穆克譚我舊臣。今死非其地。殊爲可惜。六年正月。卹贈一等副將世職。賞銀八百二十兩。順治十二年十月。追諡忠勇。立碑墓次。以示寵異。子三人。長溫察。任郎中。次艾音塔木。天聰

六年正月。襲伊父一等副將世職。順治元年四月。隨睿王多爾袞入山海關。破流賊有功。十二月。隨定國大將軍豫親王多鐸南征。由河南入潼關。同梅勒章京沙爾虎達率噶布什賢兵三次埋伏。連敗賊兵。師還殿後。敗賊追兵二次。二年三月。官兵分三路趨歸德。定河南。旋進征江南。獲偽福王。俱在行間有功。三年九月。隨定南大將軍佟圖賴兵。至寶慶地方。敗偽總兵馬盡忠。王進才等。遂復寶慶。六年。隨定遠大將軍濟爾哈朗。征湖廣流賊。八月。同尙書阿哈尼堪。師抵洪江。賊首袁宗。第二隻虎。在江對岸列十營接戰。艾音塔木隨衆渡江。擊破其衆。十二月。同阿哈尼堪敗賊王強於沅州。又敗二隻虎等賊兵。七年九年。三遇。

恩詔。加世職至二等精奇尼哈番。十一年十二月。隨靖南將軍朱瑪喇征廣東。抵新會縣。攻偽安西王李定國於山峪。十三年敘功。加世職爲一等精奇尼哈番。又兼一拖沙喇哈番。康熙十九年二月。以疾卒。

予祭葬如典禮。第三子那桑阿。初任五品官。順治十六

年三月。隨安遠靖寇大將軍信郡王羅可托。追
剿僞桂王至魯噶地方。僞晉王李定國。率四侯
三伯僞將軍等。立寨拒敵。徒步隨官兵往擊。連
敗其衆。定國遁。康熙十三年八月。隨平寇將軍
哈爾哈齊。護軍統領桑額。往征逆藩耿精忠。擊
賊於江西建昌府有功。九月。同定南將軍希爾
根。困撫州。耿逆僞都督易天錫。率兵五千出城。
與建昌來援兵七千。兩路夾犯我兵。分頭迎戰。
大敗逆賊。遂復撫州。又僞將蔡德。率兵四千犯
進賢縣。那桑阿往擊敗之。十四年三月。僞都督

楊益茂。領賊六萬衆。在七里岡列陣拒戰。那桑
阿同覺羅舒恕。敗其衆。進至弋陽縣。敗僞總督
單德弘。僞總兵柯勝等。又敗僞總兵郭先。張文
孝。賊兵於艾山。十七年正月。護軍統領哈克山。
敗僞將軍韓大任。賊兵萬餘於老虎洞地方。並
在行間有功。二十五年。議敘授拖沙喇哈番。艾
音塔木子公圖。初襲父一等精奇尼哈番。又一
拖沙喇哈番。二十九年八月。公圖隨撫遠大將
軍伯費揚古。征厄魯特噶爾丹。由西路進兵。遇
賊兵於昭莫多。擊賊有功。三十六年五月。議敘。

又加一拖沙喇哈番。授三等伯。病故。子噶敏圖襲。

特授內閣學士兼禮部侍郎。教習庶吉士。旋陞戶部侍郎。又溫察之孫薩賴。仕至副都統。扎賴。仕至侍郎。

吳巴海。滿洲鑲藍旗人。姓瓜爾佳氏。世居烏喇地方。天命三年。從

太祖高皇帝征尼堪外闡有功。授備禦世職。天聰元年

四月。隨大貝勒阿敏。濟爾哈朗等。征朝鮮。凱旋。以二次登城功。賞人馬各四。五月。隨大兵。征明

錦州。我師攻城未下。敵兵出城。犯我汛地。吳巴海殿後督戰。敵乃退。五年三月。同孟阿圖。征瓦爾喀有功。還。

太宗文皇帝郊迎十里外。朝見畢。以所獲婦女皮幣馬牛獻。

太宗設宴勞之。六年六月。同席湯噶。追我國亡者。途遇察哈爾國五人。俱斬之。獲馬十六匹。

太宗卽以其馬賜之。十二月。奉命征烏扎喇地方。吳巴海分遣將領。每一旗兵合為一

路。四路並進。聞敵在握黑河捕魚。我兵直入。斬

三百三十八人。獲男婦幼小七百。馬牛皮張等物甚多。七年正月。同備禦郎格。攜寧古塔邊外貨物。赴朝鮮會寧城貿易。九月敘功。賞人二口。緞二疋。布二十疋。紀錄一次。十一月。同季什哈率官八員。兵三百名。往征虎爾哈部落。八年五月。吳巴海奏捷。俘婦女百口。男子五百五十五名。共婦女幼小一千四百。馬牛皮幣等物無算。十二月。又同荆古爾代。率每旗將領各一員。每牛彖甲士各一名。共四百人。往征瓦爾喀。九年四月。奏捷。收服壯丁五百六十人。婦女五百。又進獻婦女六十六口。馬牛皮張無算。六月。又報得編戶壯丁六百。人家口一千三百八十。馬牛皮張等物甚衆。尋攜招降虎爾哈部落人凱旋。

太宗命禮部大臣郊迎宴勞。卽以所獲之物賜之。八月。隨貝勒岳託駐防歸化城。聞博碩克圖之子使人往明。疑必有與之同往者。岳託遣吳巴海同阿爾津等四人。要於道。果遇其使十人。並明使者四人。全執以歸。獲馬一百八匹。駝三十七隻。又往追俄綽克。殺蒙古頭目一員。兵二十一人。

獲婦女五十。馬二十匹。牛十八頭。並獲兀山馬匹以歸。十年二月敘功。授一等甲喇章京世職。崇德元年六月。以吳巴海曾率兩旗兵。征厄勒約鎖厄黑庫倫地方。俘獲人丁甚多。編爲戶口。太宗嘉其善於用兵。授三等梅勒章京世職。十二月。喀木尼漢部落葉雷等。率妻子攜牲畜逃去。吳巴海率寧古塔兵一百。科爾沁國土謝圖親王。卓禮克圖親王。兵六百。出邊行五十日。至溫朶地方。追及之。諭令歸降。葉雷不從。遂攻入。殺四十九人。獲其妻子八十七口。馬五十七匹。葉雷遁入深山。隨同席特庫率兵追及圍之。復令歸降。終不聽。遂射殺葉雷。並殺同伴諸人。二年五月。凱旋。

太宗嘉其功。命固山額真等出迎五里。宴勞之。六月。議敘軍功。以吳巴海駐鎮寧古塔數年以來。克盡厥職。屢著勲猷。超加世職爲三等昂邦章京。

賜衣服馬匹。奴僕莊田。四年七月。以疾卒。從子傳喀襲職。

喀山。滿洲鑲藍旗人。世居葉赫蘇完地方。天命四年。於葉赫未滅之先。卽率族屬來歸。

太祖高皇帝以其智勇。授備禦世職。六年三月。取遼陽。克河東七十餘城。並在行間。著有功績。加世職爲遊擊。九年。明島帥毛文龍部下守備二員。率兵百人。來犯康古禮額駙莊。喀山往援。斬二守備。盡殲其衆。天聰八年二月。隨官兵征大同。同吳拜克敵二次。加世職爲三等梅勒章京。尋以目疾失明辭職。

世祖章皇帝順治二年。以其撫育公主有勞。優加至一等梅勒章京世職。七年九年。三遇

恩詔。加至二等精奇尼哈番。十二年十月卒。諡敏壯。照

一品大臣例立碑。十一月。長子納海襲。納海以

天命四年。同父來歸。任牛朶章京。天聰元年五月。從大兵征明錦州。攻松山。納海同喀扎海。由塔山馳往。殺明步兵五十人。明總兵祖大壽步兵來援。欲入杏山。納海同噶布什賢胡密色素渾擊敗之。我兵回時。有敵人馬兵五百。自錦州來躡我後。納海隨昂邦章京席特庫接戰。殺二十人。獲馬六十四匹。餘兵盡潰。二年。大兵復征明圍錦州。擊杏山馬兵。同噶布什賢章京等。克敵有功。崇德四年三月。偕胡密色等畧地杏山。

獲牛三十九頭。羊三百餘隻。五年九月。大兵圍錦州。敵兵出城築臺。率噶布什賢章京等馳往。擊蒙古步兵四十人。俱斬之。尋同色赫等赴小凌河口。遇錦州蒙古兵十七人。亦斬之。六年三月。圍錦州。明步兵出城外取草。納海同布丹沙爾虎達追殺四十二人。敵兵二次犯我哨騎兵汛地。同噶布什賢章京等往擊。敵遂退。八月。擊明軍門洪承疇步兵。連破敵營三座。並敗其馬兵數百。七年二月。我師圍松山。洪承疇衆兵自城內遁出。率噶布什賢章京等橫截殺入。明兵敗奔杏山。我兵乘勝追殺。至筆架山。斬首四百餘級。獲馬二百四十二匹。旗六杆。並擒哨騎二十八人。殺四十一人。三月。敘功。授半個前程世職。順治七年九年。三遇

恩詔。加至三等阿達哈哈番。十二年十一月。並伊父二等精奇尼哈番合襲。加爲二等伯。十七年二月。卒。弟納秦襲。

舒賽。滿洲鑲藍旗人。姓薩克達氏。世居薩克達地方。生而勇敢。天命四年。授備禦世職。先從大兵征哈達國有功。又征瓦爾喀什地方。率兵進

八旗通志 卷一百六十一
戰克敵。總敘前功。加授遊擊世職。凡進攻敵城。太祖高皇帝愛其勇。輒戒令勿先登。舒賽不從。強衣綿甲。奮身直前。先後攻克十六城。並著奇勲。超加副將世職。十一年八月。

太宗文皇帝卽位。擢置十六大臣之列。內勦國政。外斷民訟。天聰元年三月。同阿山等駐防義州。八年五月。隨貝勒濟爾哈朗駐鎮

盛京。崇德六年十月。以疾卒。

予祭葬如典禮。順治十二年十月。追諡壯敏。照一品大臣例立碑。子西蘭早事戎行。屢立功績。

太宗文皇帝以其智勇堪用。授牛錄章京世職。崇德八年十二月。隨梅勒章京鄂羅塞臣等征黑龍江。獲二十二人以歸。順治元年。從豫親王多鐸南征。十月。同梅勒章京喇麻擊流寇。敗敵者再。十二月。大兵抵潼關。流賊三次犯我汛地。西蘭奮勇往擊。連敗賊衆。又同滿都護敗賊於平和縣。二年五月。隨貝勒博洛等趨杭州。我兵至松江府。遇僞大學士馬士英等。率兵拒敵。西蘭偕衆將迎戰。大敗之。降其城。敘功。加半個前程世職。七年正月遇

八旗通志 卷一百一十七
恩詔。加至三等阿達哈哈番。仕至護軍叅領。西蘭子席特庫。以崇德六年十月。襲伊祖舒賽三等梅勒章京世職。八年十月。從大兵征明。攻前屯衛。城內敵兵出戰。席特庫同覺善擊敗之。斬明總兵李賦明等三十餘員。兵四千級。俘二千人。遂拔其城。順治元年四月。隨睿王多爾袞大兵至山海關外。擊敗流賊。六月。隨固山額真葉臣往平山西。取太原府。環視進攻地界。城內步兵突出。相拒。力戰敗之。進至陝西延安府。賊兵乘夜來劫我營。連擊退之。七月。隨覺羅巴哈納等追賊田侯。同孟阿圖力戰敗賊。又擊流賊營兵。俱著功績。旋同梅勒章京阿喇善。肅章京哈寧阿等往尋賊踪。途遇賊吳伯兵三千。奮擊破之。三年。敘功。加世職爲二等梅勒章京。是年以疾卒。子常舒襲。

沙爾虎達。滿洲鑲藍旗人。姓瓜爾佳氏。世居胡爾海地方。天命十年來歸。從

太祖高皇帝征瓦爾喀有功。授備禦世職。天聰元年五月。以噶布什賢章京隨大兵征明錦州。四年二月。同圖魯式勞薩等爲噶布什賢章京捉生。途

遇明哨卒擊敗之。獲馬十七匹。生擒二人。五年十二月。同碩詹。席特庫等往明國境上捉生。殺三人。擒一哨長。獲五人以歸。八年二月。同勞薩色楚等。率擺牙喇精騎八十名。廝卒四十名。往錦州捉生。並齎。

諭祖大壽書。至十三站山坡。懸書而還。九年五月。同各旗大臣扎福尼等。率每牛条下擺牙喇一名。往濟貝勒多鐸軍。十月。追敘沙爾虎達同霸奇蘭。征黑龍江功。加世職一等。尋同蘇達喇等。率兵七十名。往錦州一帶捉生。擒十一人。斬二人。獲馬二匹。騾二頭。驢二頭。牛二十一頭。還。卽以所獲

賜之。崇德二年七月。同吳拜努山等。率壯大八員。擺牙喇一百名。往畧歸化城。三年八月。同吳拜。率噶布什賢兵四十名。蒙古兵四十名。至洪山口。遇明千總二員。兵百人。陣斬二千總。獲馬二匹。又敗羅文峪明兵五百騎。獲馬四十匹。大纛二。又敗密雲縣步兵一百二十七人。並明八隊邏卒。盡殺之。十月。同喀查海等三章京。率噶布什賢兵五十人。往明義州一帶捉生。擒八人以獻。四

八旗通志 卷一百六十一
年四月。同噶布什賢章京席特庫率官兵一百五十人。往錦州界外。畧取牲畜。並捕燒炭斫木者。五月。至錦州。遇敵兵擊敗之。俘二十二人。獲馬六十一匹。牛一百九頭。驢二十三頭。比還。太宗文皇帝卽以所俘獲賜之。十一月。同席特庫率土默特部落兵二百人往寧遠。

太宗諭之曰。爾等從寧遠北界入。沙爾虎達蘇爾德鄂碩布丹等四章京。可前進誘敵。令後隊伏於近邊。臺軍瞭望不見之所。以備截擊。若誘之不出。所伏之兵。再俟一日。待會齊同還。數日後。可仍從錦州北界進。取樵採之人。沙爾虎達等遵

諭行。多所斬獲。五年三月。敘功。授二等甲喇章京世職。六年八月。任噶布什賢噶喇昂邦隨

太宗親征錦州。

賜以上駟。諭之曰。爾素日行不逮言。今番如遇敵自杏山遁去。爾等於西台橫截大路。尾踪追擊。勿容進城。沙爾虎達應曰。臣幾曾臨陣悞事耶。後杏山兵果敗。沙爾虎達竟不追襲。致敵兵進城者衆。

太宗命剛林希福等勘問云。爾更有何辭以對。沙爾虎達對曰。殺之惟有一死。宥之當效力疆場。剛林

希福等以其言奏聞。

太宗赦其罪。革噶布什賢噶喇昂邦職。七年九月。同葉赫朱瑪喇。往征虎爾哈部落。閏十一月。沙爾虎達等遣人報捷。言喀爾喀木等北十屯人民。俱已招降。共獲男婦幼小一千四百五十八名。於是月初十日。自松阿里江處起行。約十二月初五初六日可至。八年正月。沙爾虎達等凱旋。

太宗命禮部大臣迎宴入城。敘功賞。以緞布。順治元年正月。征庫爾喀部落。復有功。五月。同鄂羅塞臣征黑龍江。仍大獲凱旋。

世祖章皇帝遣明安達里等往迎宴勞之。卽

賜以所獲貂皮諸物。十二月。隨定國大將軍豫親王多

鐸南征。同艾音塔木連敗賊兵。旋進師潼關。殿

後。有流賊兵三次來犯。同艾音塔木屢擊敗之。

二年六月。隨貝勒博洛進師杭州。大敗明兵。多

著奇績。三年五月。敘功。授一等甲喇章京世職。

四年十月。率官兵駐防東昌。十二月。聞賊首丁

維岳。張中堯。肆毒東兗。率兵往援。盡殲其衆。賊

渠當陣授首。五年四月。任纛章京。爲議政大臣。

六年七月。河間一路土寇竊發。率兵勦撫平之。

七年三月。調爲滿洲固山梅勒章京。三遇恩詔。加世職至一等阿思哈尼哈番。尋往駐防寧古塔地方。十年五月。陞昂邦章京。十四年二月。世祖特賜蟒衣貂帽鞍馬腰刀緞布。十五年七月。擊敗羅刹兵。獲其人口甲仗等物。十六年正月。以疾卒。

世祖特諭吏部。寧古塔係邊疆要地。昂邦章京沙爾虎達。防守有年。人心咸服。今已長逝。其子巴海。素著敏慎。堪勝此任。着卽代其父爲昂邦章京。前往駐防。三月。沙爾虎達喪至。

京師

特命內大臣公愛星阿。侍郎甯古里。齎茶酒往奠之。閏三月。遣官諭祭。五月。追贈太子太保。諡襄壯。立碑墓道。

巴海。沙爾虎達長子也。順治十六年正月。代伊父爲昂邦章京。鎮守寧古塔地方。九月。始襲伊父一等阿思哈尼哈番。十七年七月。偕副都統尼哈里等。率兵至薩哈連松阿里兩江合處。偵聞羅刹賊衆。在費牙喀國西界。領兵前進。抵使狗地方。我兵船潛伏兩岸。賊艘奄至。伏發賊卽

回遁。督兵襲追。賊棄舟登岸。倒戈敗走。斬首六十級。溺死者甚衆。獲婦女四十七口。並火礮盛甲器械等物。招降費牙喀國十五村。一百二十餘戶。康熙四年八月。改職銜爲鎮守寧古塔將軍。十年九月。

遣侍衛往賜裘帽等物。十月。

聖祖仁皇帝詣盛京謁陵。至愛新地方駐蹕。召巴海。問寧古塔及瓦爾喀虎爾哈人民風俗。奏對明敏。

聖祖諭之曰。朕向聞爾賢能。今侍朕左右。朕益知爾矣。

費牙喀黑折雖服。然其性暴戾。瓦爾喀虎爾哈人皆奸詭。爾當善爲防之。廣布教化。多方訓迪。以副朕懷。遠至意。羅刹雖云投誠。務加意防禦。操練士馬。整備器械。毋墮狡計。至於地方應行大事。卽行陳奏。毋得疑畏。爾膺邊方重任。尙其黽勉。以報朕知遇之恩。十三年十一月。率松阿里烏喇等處黑爾折勤氏。新滿洲佐領四十員。並佐領下人入覲。十四年正月。

特賜元狐裘貂朝衣各一襲。時察哈爾布爾尼作亂。三月同倭內巴圖魯奉

命固守

盛京十七年閏三月。

聖祖特諭吏兵二部曰。宣猷效力。臣子之常經。晉秩酬庸。國家之大典。鎮守寧古塔將軍巴海蒞任以來。彈壓巖疆。展布宣畧。實心任事。籌畫周詳。允爲稱職。出其智謀。將札奴喀等。新滿洲移居寧古塔。分佐領授室家。咸令得所。懷柔遠人。有裨軍國。殊屬可嘉。應給世職。以示鼓勵。優賞一等阿達哈哈番。世襲罔替。二十一年三月。

聖祖幸盛京。駐蹕阿爾灘訥門地方。巴海來朝。四月。

賜宴。並袍服鞍馬緞疋等物。二十二年四月。奉

命駐鎮烏喇。六月。緣事部議革去將軍並世職。奏入。

聖祖特諭兵部曰。巴海移居各姓新滿洲。厥功最茂。著留其一等阿達哈哈番世職。餘世職及將軍任。悉革去。二十三年五月。陞本旗蒙古都統。任議政大臣。二十五年二月。以疾卒。

予祭葬如典禮。達爾珠沙爾虎達之族人也。早年效力戎行。崇德二年八月。隨揚威大將軍貝勒岳託。證明我兵攻靈壽縣。達爾珠奮勇豎梯。繼根特以第二人登城。遂克其城。四年敘功。授半個前

程世職。順治七年九年。三遇

恩詔。加至三等阿達哈哈番。十一年正月病故。子戴察襲職。是年六月。隨靖南將軍固山額真朱瑪喇。往征廣東。十二月。在新會縣山峪。敗偽安西王李定國步兵四萬餘。追至興業及橫州地方。定國遁去。乃班師。十五年正月。隨安遠靖寇大將軍信郡王多尼等。進征雲貴。官兵至魯噶地方。偽晉王李定國。率偽侯偽伯將軍等馬步兵一萬七千。列陣相拒。戴察隨大兵進戰。連破之。十八年論功。加世職爲二等阿達哈哈番。是年卒。六月。子朱什里襲。康熙十九年。隨征南大將軍賴塔。征逆孽吳世璠。二十年三月。由廣西進雲南。至黃草壩地方。擊偽將軍何繼祖等。敗之。直抵雲南城下。會同三路大兵。敗偽將軍胡國柄等。平雲南。在事有功。二十五年議敘。加授爲一等阿達哈哈番。

八旗通志初集卷之一百六十八
名臣列傳二十八

鑲藍旗滿洲世職大臣二

席特庫

圖捫 子圖彥圖

藍拜

根特 父尼努

顧三台

明阿圖

賽弼翰

康喀賚 子西納海

巴篤禮

子海都

席特庫。滿洲鑲藍旗人。世居佟佳地方。以地爲氏。其父努顏。自佟佳率族屬鄉黨來歸。

太祖高皇帝始編牛錄。令努顏管其一。既卒。以席特庫

襲管伊父牛錄事。因其才能勤慎。授備禦世職。

明兵來犯。顧三台額駙所管屯堡。席特庫率衆

往援。擊退其衆。天聰五年。征明大凌河。八固山

兵四面進攻。我將多貝戰歿。席特庫奮身殺入

敵陣。取多貝屍而還。併擊敵兵。敗之。明大凌河

城內兵屢出犯我臺堡。席特庫三敗之。七月。往

北京。遇寧遠兵來戰。我兵一人墜馬。同敦拜領

燾衝殺敵衆披靡。援墜馬者出。八年四月同布哈塔布囊等往畧地杏山。斬蒙古七十三人。獲婦女九口。駱駝十二。馬四十五。又獲閒散瑣諾木下男子九十名。婦女十八口。尋同卦爾察尼堪往濟農城。尋躡敵踪。遇明兵百人。擊敗之。斬首七級。生擒一人。獲馬十六匹。十一月敘功加世職爲遊擊。崇德三年八月。隨揚威大將軍貝勒岳託。征明。同努山等在邊外。遇明兵四十人。生擒三人。斬三十七人。掘得火藥五處。入邊時。墻子嶺敵兵突出。截戰。席特庫同勞薩碩翁科

洛巴圖魯分頭拒敵。敗其衆。獲馬八十六匹。明吳總兵率兵來戰。復同勞薩碩翁科洛巴圖魯奮勇前擊。敵兵大敗。並敗其伏兵五百騎。獲馬十一匹。明兵自真定府來襲我後。復同勞薩碩翁科洛巴圖魯力戰却之。明太監高起潛復率兵尾後追殺。同勞薩碩翁科洛巴圖魯設伏敗之。斬首十六級。獲馬二十五匹。高起潛復率衆夜犯我營。席特庫同努山擊敗之。直追至運糧河。三敗其衆。我師出邊。復擊明山谷步兵有功。六年三月。隨鄭親王濟爾哈朗圍錦州。偕噶布

什賢八章京敗松山馬兵數百。八月明軍門洪承疇率兵二隊拒敵。同勞薩碩翁科洛巴圖魯合兵往擊。勞薩戰歿。席特庫獨戰。逼敵至大壕邊乃還。十月我兵至松山。洪承疇馬兵來侵。偕噶布什賢八章京擊敗之。斬二十七人。獲馬十六匹。洪承疇兵自松山來追。復同噶布什賢八章京回擊。敵奔杏山。仍率兵截殺。追至筆架山。斬四百人。獲馬二百四十餘匹。大燾六桿。七年二月。隨大兵圍松山城。內敵兵夜出。席特庫同布爾遜擊之。追至塔山。獲馬二十二。駱駝一。三

月。杏山馬兵遁走。同布爾遜索渾追之。殺一百四十九人。獲馬四十一。是夜偕布爾遜往塔山截敵兵去路。遇夜遁兵三百。斬三十三人。旋設伏杏山坡。殺二十七人。以歸。駐營杏山河邊。有寧遠馬兵一千。來窺我斥堠。偕噶布什賢八章京追至連山。斬三十人。獲馬三十二。十一月。隨豫郡王多鐸赴寧遠城。往觀寧遠壕塹。遇明兵擊敗之。殺四十七人。並擒夜探哨騎十五人。斬四十四人。是年加世職爲二等甲喇章京。我兵入界嶺口。席特庫率本旗噶布什賢先驅。遇明

守備一員。馬步兵二百。卽同噶喇昂邦努山擊之。擒把總二員。獲馬一百五十八。八年五月。隨奉命大將軍貝勒阿巴泰。征明。率噶布什賢兵。大破明白總兵。順治元年四月。隨睿王多爾袞。征明。至山海關外。擊流賊僞總兵唐通。破之。尋追賊至安肅縣。大殪其衆。至慶都縣。誘敵來戰。破之。擒哨騎十五人。殺五人。獲馬十一。五月。從固山額真葉臣等。往定山西。追勦流賊。至絳州渡口。沉其六船。賊盡溺死。後至汾州府。率噶布什賢四十名。先行。遇田總兵哨卒。擊敗之。漸近賊營。敵兵出戰。力破其軍。二年。流寇遁往湖廣。追至承天府渡口。率噶布什賢兵。乘船擊之。獲船二十二。遂逼賊至湖邊。斬四百餘人。旋往鐵牛堡偵探。遇敵兵一隊。立營。同噶喇昂邦西忒庫破其營。是年敘功。授一等甲喇章京。世職。三年。隨豫親王多鐸。追騰機思。四年。從征陝西。流寇有延安府賊兵來犯。我正白旗汛地。率衆往援。斬殺甚多。又敵兵二次侵鑲黃旗哈爾哈汛地。偕胡薩往援。敵乃退。是年敘功。加世職半個。前程。七年。九年。三遇。

八旗通志 卷一百一十八
恩詔。加至一等阿思哈尼哈番。康熙五年三月。以疾卒。
子祭葬。仕至副都統。

圖捫。滿洲鑲藍旗人。姓西林覺羅氏。父屯台。初
自汪秦地方率族屬來歸。

太祖高皇帝見屯台甚愛重之。遂取屯台女弟爲巴圖
魯郡王禮敦妃。以覺羅尊屬。瓦爾喀女弟妻之。
初設牛录時。卽以其族屬編爲牛录。使屯台統
焉。及圖捫襲父職。屢從五大臣征伐有功。天聰
五年。從征明大凌河。首先敗敵。明監軍道張春
率衆數萬來援。鋒甚銳。圖捫復身先迎擊。敵營
火礮齊發。中圖捫股。股斷。一筋未殊。奮勇自若。
堅壁不退。待大兵繼進。遂破明兵。

太宗文皇帝嘉圖捫功。聞傷股。親臨撫問。圖捫奏言。臣
創雖深。然觀敵勢。剽輕易滅也。願勿以臣爲念。
太宗駕回御營。復命鄭親王濟爾哈朗往視圖捫。欻歔
久之。謂王曰。吾傷重。不復能乘馬殺敵。乞王奏
請。使爲吾截去股。以油炙之。雖殘廢。猶堪爲
朝廷司閫也。是夕竟卒。

太宗軫悼甚至。特給備禦世職。使其子圖彥圖襲焉。仍
帶叅佐本秩如故。順治元年四月。圖彥圖隨睿

王多爾袞入山海關擊流賊。率本甲喇於屯齊貝子前進戰。敗賊有功。遷戶部郎中。五月追流賊至慶都縣。斬獲甚衆。然未及議敘。尋病卒。以長子圖拜襲。第三子鄂拜。嫻文雅。篤信好古。有儒者風。官國子監祭酒。其子孫皆以鄂爲姓。雍正三年。

世宗憲皇帝特勅建昭忠祠。祀死節諸臣。圖捫與焉。時鄂拜子鄂爾泰。圖捫曾孫也。總督雲南貴州。五年兼督廣西。七年以平苗功議敘。因奏請願以議敘之官。馳封曾祖。旋奉

世宗諭旨。鄂爾泰忠誠體國。經理苗疆。勳績茂著。伊曾祖圖捫。於開國時。奮勇陷陣。効力疆場。忠節炳然。垂光行慶。積於其孫。鄂爾泰爲不世出之良臣。祖孫忠良。後先輝映。朕甚嘉焉。今鄂爾泰奏稱曾祖圖捫。與祀昭忠寺。牌位列銜。佐領請照固原提督紀成斌之父。守備紀法業。恩給誥封。贈官之例。請將苗疆議敘之案。移賞曾祖祖父。誥封著將鄂爾泰之曾祖祖父。俱照總督加內大臣。兵部尚書職銜。給與一品誥封。其昭忠寺圖捫牌位。改書新贈之銜。入於大臣之列。鄂爾泰苗疆之案。仍著議敘。先是昭忠祠祀典。大臣

置主堂上南向。庶官列祀兩傍東西向。至是始陟圖捫主位列於堂。忠勇之報。觀者咸興起焉。鄂爾泰。今晉少保。保和殿大學士。爾泰兄弟六人。長鄂善。翰林院筆帖式。次鄂賚。太學生。早卒。次鄂臨。泰內閣中書。次卽爾泰。次鄂爾奇。戶部尚書。兼理九門提督。次鄂禮。監察御史。巡視長蘆鹽政。署天津總兵官。善子鄂昌。四川巡撫。臨泰子鄂敏。爾奇子鄂倫。俱翰林院編修。爾泰子六人。俱年少。長鄂容安。與倫會試同榜。亦官翰林院編修。

藍拜。滿洲鑲藍旗人。世居佟佳地方。以地爲氏。

太宗文皇帝時。授牛錄章京。世職。以戰功累陞至梅勒

章京。天聰八年二月。同阿山等往畧錦州。三月。還。獲馬牛五十二。崇德四年五月。緣事革梅勒章京任。十一月。同曹海等。征索倫部落。獲丁壯八百三十五人。五年四月。同阿哈尼堪等。克雅克薩城有功。七月。賞貂皮四十七張。人三口。加世職半個。前程。六年三月。隨鄭親王濟爾哈朗。圍明錦州。明松山馬兵來奪我紅衣礮。率兵奮擊。敗之。五月。任兵部叅政。八月。

太宗親統六師。往征錦州。藍拜隨大營前進。擊明軍門
洪承疇三營兵。敗之。明兵乘雨後犯我右翼汛
地。復率兵往擊。敵乃退。十月。轉禮部叅政。順治
元年四月。隨睿王多爾袞。破流賊於山海關外。
二年。敘功。授三等甲喇章京世職。四年十一月。
率右翼兵往湖南。赴恭順王孔有德軍前。尋隨
恭順王克岳州。進兵至長沙。僞巡撫何騰蛟。總
兵王進才。已先遁去。遂同卓羅探其所向。遇王
進才部衆。捨舟登岸逆戰。同卓羅奮擊斬之。師
次湘潭。聞僞伯黃朝選擁賊十三萬。屯於燕子
窩。隨恭順王孔有德及佟岱等。由水路進至瀟
口。擊破北岸賊營。聞賊兵圍桂陽州。復隨智順
王尚可喜赴援。既至。賊已解圍遁走。又聞流寇
郝搖旗據道州。率兵前往。郝亦奔遁。僞伯張憲
弼者。部下總兵。立五營於黔陽。藍拜往圍之。賊
出城迎戰。奮擊敗其衆。斬首七千餘。師旋至沅
州。僞伯張憲弼擁馬步兵三萬出城拒敵。復敗
之。遂克其城。五年九月。凱旋。賞金十兩。銀二百
五十兩。陞本旗固山額真。十二月。緣事降爲梅
勒章京。六年正月。敘功。授二等阿達哈哈番。七

年遇

恩詔。加至一等阿達哈哈番。八年三月。仍陞本旗固山額真。九月。任工部尚書。九年。遇二次

恩詔。加世職至二等阿思哈尼哈番。轉刑部尚書。十月。解刑部尚書任。十一月。同固山額真卓羅。往征廣東未定州縣。十年十二月。同寧南靖寇大將軍陳泰等。往湖南征僞桂王。並在事有功。十三年四月。以老病乞休。

上念其効力有年。加太子太保致仕。康熙四年七月。以疾卒。

予祭葬如典禮。

根特。滿洲鑲藍旗人。姓瓜爾佳氏。世居尼馬察地方。父曰尼努。天聰八年。授牛錄。章京。世職。九年。隨霸奇蘭。征黑龍江有功。加半個前程。根特初襲父職。順治元年二月。任刑部理事官。四月。隨睿王多爾袞。山海關。剿流賊。至一片石。敗賊帥唐通。追流賊。慶都縣。斬殺甚衆。又聞馬。墜口土賊作亂。同阿爾布尼。前往剿撫。遇流賊。馬步兵擊敗之。二年。敘功。加世職。爲三等甲喇。章京。六年八月。隨陝西總督孟喬芳等。往征山。

西流寇虞允。初允等奉偽桂王年號。陷蒲州。及臨晉諸縣。根特督兵渡河。直趨蒲州。殺賊無算。復其城。臨晉諸縣悉平。尋同副將趙光瑞等領兵赴平陽。聞賊趨榮河。迅往勦捕。途遇偽帥白璋等。領兵六千。列陣迎敵。根特偕副將趙光瑞等奮擊。大破其衆。斬首二千有奇。餘賊北遁。我兵追至黃河。賊多溺死。斬偽帥白璋。餘賊逃入孫吉鎮。悉殲之。遂引兵趨猗氏縣。行十餘里。偽監軍道衛登芳擁賊數千。依山爲營。以拒我兵。又有偽帥張萬全領賊衆前來迎敵。根特分兵奮擊。陣斬張萬全。並殺賊四千餘。乘勝回擊。衛登芳斬賊兵三千有奇。生擒登芳。並斬偽副將王國興等三十餘員。復由猗氏趨聞喜縣。過候馬驛。遇偽都督郭仲傑率賊兵萬餘迎戰。根特奮勇衝殺。賊徒潰散。追殺三十里。斬首八千級。獲器械馬騾無算。七年九年。三遇

恩詔。加世職至一等阿達哈哈番。又兼一拖沙喇哈番。

十年五月。同侍郎哈哈木。往鄖陽府。破賊甄以鐘等於房縣。尋駐防西安府。聞藍田一。賊兵作亂。同夸扎征擊。大敗賊渠房國成於谷口。六

月。隨貝勒吞齊。往征湖南。直趨寶慶。經岔路口。遇僞秦王孫可望等。賊兵十萬。根特同覺羅莽嘉分頭奮擊。斬首甚衆。復往援正黃正紅二旗。擊敗賊衆。進至武岡州。有牧馬賊。步兵千餘來犯。根特與戰。破之。尋議敘。授三等阿思哈尼哈番。十一年九月。隨定海大將軍宜爾德。往浙江。征僞魯王。勦舟山。有僞英毅伯阮思等來拒。卽偕右翼官兵敗之。獲船二隻。又僞總制陳六御等。率賊三萬。船二百餘隻來犯。復偕衆軍擊敗。其衆獲船二十五隻。紅衣礮一百六十餘位。遂復舟山。安定百姓。十四年敘功。優加世職。爲一等阿思哈尼哈番。十五年五月。陞蒙古固山梅勒章京。康熙十六年三月。陞本旗滿洲都統。任議政大臣。二十三年四月。以老病乞休。允之。三十三年八月。以疾卒。

予祭葬。加祭一次。諡襄壯。

顧三台。滿洲鑲藍旗人。姓納蘭氏。世居葉赫地方。

太祖高皇帝時。率族人來歸。始授叅將。世職尚公主。封固倫額駙。隨大兵征明。往取廣寧城。首先突入。

敵陣身受數創。力戰不休。遂敗敵兵。優加副將世職。天命十一年八月。

太宗文皇帝御極。設八大臣。以顧三台額駙爲鑲藍旗固山額真。內理國政。外治戎兵。天聰元年三月。隨大貝勒阿敏征朝鮮有功。四月凱旋。

太宗行抱見禮。三年十月。我師攻遵化。顧三台率本旗兵。分攻城西南隅。克之。四年正月。同達爾漢等率兵千人。馳往攻昌黎縣。又同那木泰等。三固山額真。各率本旗兵。駐防灤州。五年三月。緣事解固山額真任。順治元年五月。

定鼎燕京。大敘舊勳。賞貂皮七十五張。緞七十五疋。器皿無算。專管牛錄事。尋卒。

明阿圖。顧三台子也。順治元年初。管牛錄事。署梅勒章京。我師入燕京時。殿後督兵。多建奇績。二年正月。敘功。授牛錄章京。世職。任都察院叅政。四年。課績。加半個前程。六年十月。陞蒙古固山梅勒章京。七年。遇。

恩詔。加世職。至三等阿達哈哈番。八年二月。卒。以長子關柱襲職。

賽弼翰。顧三台之孫。明阿圖之次子也。初任護

軍叅領。康熙十八年正月。隨平南將軍賴塔。往
勦浙閩海寇。遇僞將軍劉國軒等。賊兵二萬。在
夏坑拒戰。偕衆擊敗之。劉國軒至郭塘。歐溪。欲
犯我常泰軍。卽領本旗兵往助。擊敗其衆。四月。
僞將軍劉國軒。吳淑等。率賊萬餘。在洞危山梁。
拒敵。仍隨賴塔。敗之。並敗太平寨賊兵六千衆。
二十年二月。隨征南大將軍賴塔。往征逆孽吳
世璠。敗僞將軍何繼祖等。於廣西之石門坎。三
月。我師至雲南黃草壩地方。復破何繼祖等。直
抵雲南城下。會同三路大兵。平定雲南。並在事
有功。二十三年八月。陞本旗蒙古副都統。二十
四年三月。轉滿洲副都統。二十五年。敘功。優授
拜他喇布勒哈番世職。二十九年十一月。卒。

予祭葬。

康喀賚。滿洲鑲藍旗人。姓胡爾虎氏。自烏喇地
方。率弟子於

國初來歸。

太祖高皇帝始編牛錄。使統其一。屢從征伐。有功。位在
十札爾固齊之列。天命十一年八月。

太宗文皇帝御極。置十六大臣。內贊國政。外理民訟。康

喀賚與焉。天聰元年正月。貝勒杜度所屬巴卜富喇塔二牛泉。蒙古五十人。自奉集堡亡去。康喀賚同阿達海等。追至都爾鼻地方。盡殺之。五年四月。初設六部。以康喀賚任工部承政。崇德四年五月。兼任梅勒章京。順治元年。從豫親王多鐸南征。二年六月。至淮安。同遊擊范炳。領兵渡清河。以礮擊敗敵艦。是歲改南直隸爲江南。十一月。康喀賚率左翼官兵駐鎮江寧。三年正月。江寧城內民與城外賊同謀作亂。率兵往捕。殺爲首者三十人。僞潞安王等率兵二萬三路來犯。康喀賚出城力戰。俱擊敗之。尋卒於官。子西納海。初任牛泉章京。崇德六年三月。隨貝勒濟爾哈朗圍錦州。同噶喇昂邦努山往杏山北臺埋伏。遇敵哨騎自杏山出。偕衆追及。擒蒙古一人。又同雅巴蘭往寧遠擒明哨卒。獲一蒙古以歸。順治元年四月。從睿王多爾袞入山海關。破流賊。在事有功。五月。偕轄十員。隨固山額真吞齊貝子。追流賊至慶都縣。大殮其衆。二年正月。敘功。授半個前程。世職。七年九年。三遇

恩詔。加至三等阿達哈哈番。仕至副都統。康熙十二年

三月以疾卒。

予祭葬如典禮。

巴篤禮滿洲鑲藍旗人。姓佟佳氏。世居佟佳地方。

太祖高皇帝時。累事戎行。任牛录章京。遷甲喇章京。尋遷至梅勒章京。復補陞燾章京。勤勞甚著。

太宗文皇帝優授一等參將世職。崇德元年十二月。征明。巴篤禮奉

命同燾章京鞏阿岱等。率每牛录擺牙喇一名。往濟豫親王多鐸軍。分左右翼兵。兩路出畧明境。二年

四月。緣事革職。三年八月。隨揚威大將軍岳託。征明。至山東。攻克濟南府城。招撫十八郡。准以

功贖前罪。仍補梅勒章京。復往攻臨清。巴篤禮殿後。大獲全勝。六年十月。任兵部參政。八年十

二月。同梅勒章京鄂羅塞臣。征黑龍江。順治元年五月。凱旋。

世祖章皇帝遣侍郎明安達理等往迎。宴勞之。十一月。任本旗固山額真。三年四月。敘功。授半個前程。

世職。尋以疾卒。子海都襲職。康熙十八年。海都從征逆孽吳世璠。至湖南武岡州。破賊有功。二

十五年議敘。加授世職爲拜他喇布勒哈番。仕至護軍叅領。

八旗通志初集卷之一百六十九

名臣列傳二十九

鑲藍旗滿洲世職大臣三

巴特瑪

弟博思喜

胡什布

子穆徹納

額孟格

布哈

富寧安

叔祖尼喀納

巴特瑪滿洲鑲藍旗人。姓博爾濟吉特氏。世居克爾倫地方。伊蘇特貝子之孫也。天命四年。同伯父寨桑古英和碩齊率族屬來歸。

太祖高皇帝賜寨桑古英達爾漢和碩齊之號。授三等副將世職。時巴特瑪年幼未授職。天聰二年。念巴特瑪歸誠之功。始授世職為遊擊。分隸大貝勒濟爾哈朗屬下行走。

太宗文皇帝諭曰。爾在蒙古地方擇地而居。今雖在大貝勒屬下。然朝夕侍朕左右。朕必加恩卹。天聰五年。

隨

太宗征明。攻大凌河。六年四月。又從征察哈爾國。並有功。崇德元年。任都察院理事官。累陞蒙古固山額真。十二月。隨

太宗征朝鮮。奉

命同固山額真譚泰等。率阿禮哈朝哈兵。往攻其京城。搜勦軍民。併收其財物牲畜。巴特瑪率衆監梯。登其城。敵兵各奔竄。遂盡收其財物牲畜以歸。二年六月。兼管喀喇沁牛錄事。是年。管圍場二次。

太宗嘉其能。

賜馬一匹。三年。往歸化城。開修道路。得一等功牌一本。年十月。隨揚威大將軍貝勒岳托征明。領本固山兵及外藩兵。從平坦處攻密雲縣。首先登城。叙功。賞馬二。駱駝一。金五兩。銀六百兩。五年。隨睿親王多爾袞征明。圍錦州。同葉克舒設伏松山。大敗敵兵。是夜。敵兵來犯我營。復同羅托擊敗之。身受重傷。猶力戰不懈。六年八月。擊明軍門洪承疇。在事有功。九月。奉

命同安平貝勒圍錦州。七年。錦州降。九月。同固山貝子羅託等駐防錦州。八年五月。隨饒餘貝勒阿巴

泰。征明至山東。同墨爾根轄。大敗敵兵。生擒明
劉總兵。又擊明王副將兵。率滿洲兵。及喀喇沁
蒙古四旗兵。在西里穆克山交戰。大獲全勝。九
月。攻孫河棗強。克其二城。俘獲甚衆。順治元年
四月。隨睿王多爾袞至山海關。擊流賊偽總兵
唐通。敗之。五月。復隨英親王阿濟格。破流賊於
慶都縣。二年正月。叙功。優授一等甲喇章京。兼
半個前程世職。賞金二十兩。銀四百兩。三年十
二月。隨肅親王豪格。征四川流賊張獻忠。敗之
於西充。五年三月。緣事奪半個牛彖。七年九年。

三遇

恩詔。加至一等阿思哈尼哈番。復緣事革去一拜他喇
布勒哈番。並一拖沙喇哈番。餘一等阿達哈哈
番。兼一拖沙喇哈番。十五年七月。任散秩大臣。
康熙十一年六月。以疾卒。博思喜巴特瑪伯父
古英和碩齊之子也。崇德三年。襲伊父三等梅
勒章京世職。順治元年四月。隨睿王多爾袞。至
山海關外。同梅勒章京圖占。敗流賊有功。三年
五月。隨揚威大將軍豫親王多鐸。追騰機思。擊
土謝圖汗兵。同石圖力戰。敗之。又擊碩羅汗兵。

復偕石圖大破其衆。四年叙功。加一拖沙喇哈番。七年九年。三遇

恩詔。加至一等阿思哈尼哈番。十七年六月卒。

胡什布。滿洲鑲藍旗人。姓納拉氏。世居葉赫地方。

國初。率族屬來歸。

太祖高皇帝以其所攜人丁。編爲牛衆。卽令胡什布管理。天聰二年六月。有阿山阿達海等。自詡材勇。以未獲擢用。遂叛歸明。胡什布隨大貝勒阿敏。乘夜馳追。殺其二子。又矢射阿山。

太宗文皇帝嘉其功。授叅將。尋從征通古索爾和安住。城池。殺守備一員。被傷七處。叙功。授牛衆章京。世職。順治七年九年。三遇

恩詔。加至二等阿達哈哈番。累任至都統。長子穆徹納

順治三年五月。隨揚威大將軍豫親王多鐸。征尼蘇特部落騰機思等。同穆哈達率轄員。擊敗土謝圖汗並碩羅汗兵。四年六月。任擺牙喇甲喇章京。六年正月。從征山西叛鎮姜瓖。攻寧武關。僞總兵劉偉思。率賊三千出城拒敵。穆徹納偕雅賴奮勇敗之。又同燾章京藍拜。敗宜孟臣。

賊兵千餘。有賊兵自索州來援。穆徹納領燾前進。同庫祿克達爾漢等敗其衆。尋往左衛。解送紅衣礮。至吳家峪地方。遇賊千餘阻路。率兵步戰勝之。七年九年。三遇。

恩詔。授拜他喇布勒哈番世職。兼一拖沙喇哈番。十一年十二月。隨靖南將軍朱瑪喇征廣東。在新會縣山峪口。敗偽安西王李定國兵。十三年議叙。優授三等阿達哈哈番。

額孟格。滿洲鑲藍旗人。姓薩察氏。世居渾春地方。

國初。自瓦爾喀率族人來歸。

太祖高皇帝。始編牛朶。令管其一。天命十一年八月。

太宗文皇帝御極。擢置十六大臣之列。順治元年八月。任寧遠城守尉。九月。額孟格率寧遠兵。同梅勒章京何托等。往定山東河南。在青州馬井洞地方。偕兩翼官兵舉火夜戰。賊衆大敗。克四十餘洞。復隨饒餘貝勒阿巴泰。攻濟寧臺堡。額孟格率兵力取一臺。陣斬賊首甚多。十二月凱旋。

世祖章皇帝。賜黃金。彩幣。貂皮等物。授牛朶章京世職。七年九年。三遇。

恩詔。加至二等阿達哈哈番。十二年四月卒。孫法福禮襲職。

布喀。滿洲鑲藍旗人。姓覺羅氏。世居東尼城地方。

太宗文皇帝時。襲管伊父查海牛朶事。順治元年。四月。隨睿王多爾袞。入山海關。破流賊有功。授拜他喇布勒哈番世職。兼一拖沙喇哈番。仕至副都統。子馬奇襲職。並襲管佐領。馬奇亦以軍功。得二等功牌。仕至副都統。

富寧安。滿洲鑲藍旗人。大學士阿蘭泰子也。康

熙二十五年七月。襲伊叔祖尼喀納拜他喇布勒哈番。任三等護衛。兼前鋒護衛。三十八年九月。襲管伊父佐領。仍兼前鋒護衛。尋陞驍騎參領。管火器營事。四十一年十月。補鑲紅旗滿洲副都統。四十四年五月。陞倉場侍郎。整飭漕務。甚著清聲。十月。補正黃旗漢軍都統。四十六年十一月。陞都察院漢缺左都御史。十二月。改滿缺左都御史。任議政大臣。四十七年四月。疏言大通橋舊有滿漢監督二員。於四十一年裁汰。將糧務著坐糧廳管理。今令清河糧務。又歸併

坐糧廳難以兼理。請復設大通橋滿漢監督二員。詔從所請。是年五月。遷禮部尚書。仍兼管倉場事務。轉吏部尚書。兼理八旗公庫事務。清帑金。肅銓政。盡絕情面。五十四年。四月。策妄阿喇布坦侵我哈密。富寧安奉

命率滿洲侍衛十員。馳驛赴西寧。

聖祖仁皇帝諭曰。朕以爾堪信任。故命爾前往。軍中凡事俱宜詳慎。若離朕相近。猶可指授調遣。今相隔甚遠。遇有倉猝。卽馳驛傳送。亦多需時。日軍機大事。宜遲緩爾至。彼有急調遣之事。不必請旨。卽與將軍

席柱商酌而行。是年十二月。富寧安疏言。今將噶斯

一路官兵撤回肅州牧養馬匹。但肅州地方窄狹。二千兵丁不能盡容。且從他處運送草豆。又煩費錢糧。而甘州地方寬厰。民房甚多。倉內既有存貯麥豆。且於附近地方買送草束亦便。今令西安滿洲兵一千名。駐札肅州。督標綠旗兵一千名。駐札甘州。各令加謹約束。勿致生事擾民。

詔從所請。五十六年三月。疏言。巴爾庫爾一路兵丁。揀

選八千五百名。分爲兩路。前往襲擊策妄阿喇
布坦邊界烏魯木齊吐魯番等處。得

旨。軍務關係緊要。富寧安授爲靖逆將軍。給與印信。五
十七年二月。疏請赤斤設立赤斤衛。邊理圖設
立靖逆衛。各添設衛守備一員。錫拉谷爾設立
柳溝所。添設守禦所千總一員。再添設同知通
判各一員。兼管二衛一所。其駐房兵丁武職官
員。令肅州鎮管轄。衛所官員。令肅州道員管轄。
五十九年三月。疏言。今歲議發大兵進剿西藏。
其阿爾泰巴爾庫爾兩路兵。亦約會前進。襲擊
準噶爾邊境之地。使賊人擾亂。可以相機行事。
臣請率兵三千。進剿烏魯木齊一路。分兵四千。
進襲吐魯番一路。其領兵大臣。請

旨。派遣。又兩路進兵之後。另派兵三千。隨後策應。其餘
存留之兵。暫交副都統雅圖。侍郎海壽等管理。
並奉

旨。如所請。八月。疏言。臣於七月初一日。率兵七千啟行。
初二日。駐叟集地方。臣將此兵內選精兵一千。
輕騎前行。至烏爾圖地方。晝伏夜行。初六日。黎
明。進兵烏蘭烏蘇之源。烏蘭烏蘇之口。及托和

八旗通志 卷二百六十九
穆圖等處。並無賊哨。四面搜捕。亦無踪跡。初七日。駐兵烏蘭烏蘇口內。是晚。派一等侍衛哲爾德等。領兵前進阿克塔斯。派二等侍衛克什圖。一等侍衛阿玉錫等。領兵前赴伊爾布爾和碩。分擊賊哨。瀕行時。臣囑哲爾德等。烏蘭烏蘇與阿克塔斯。相距七十里。與伊爾布爾和碩。相距百餘里。爾等至阿克塔斯相近處。卽行潛伏。約計克什圖之兵。至伊爾布爾和碩時。爾等始行往擊。慎勿急於進兵。使伊爾布爾和碩之賊。預先知覺。又囑克什圖等。爾等沿瀚海邊界前進。

於天未明時。卽抵伊爾布爾和碩。圍擊賊哨。臣率署前鋒統領法瑤。副都統常壽等。隨後前進。初八日。侍衛哲爾德等。擊阿克塔斯賊哨。賊衆畏我兵勢。望風而走。我兵急往追捕。擒獲一賊。餘賊入山中逃散。侍衛克什圖等。擊伊爾布爾和碩賊哨。見賊之馬匹。在谷內營邊牧放。阿玉錫帶領十餘騎入谷。奪賊馬百餘匹而回。賊以我兵掩至。據高山絕險之處。藏身樹石。放鎗拒敵。克什圖等率兵奮勇追擊。阿玉錫衝入賊中。刺殺三人。衆官兵等共殺賊三十餘人。生擒二

十四人所獲馬匹器械等物。臣卽分給効力官兵等。其賊哨頭目杜爾伯特、台吉吹木拍兒現被擒獲。宜卽解送京師。因吹木拍兒身帶重傷。暫送巴爾庫爾。交付副都統雅圖。俟回兵時。再將吹木拍兒解送京師。其餘所獲賊衆。應否全送京師。請

旨定奪。得

旨。將軍富寧安圍擊賊哨。生擒二十餘人。著行文副都統雅圖。派兵送來京師。沿途嚴加看守。勿致逃亡。其吹木拍兒暫停起解。俟瘡痍愈後。再行解京。八月三

十日。疏報散秩大臣阿喇納等。於七月初一日。進兵齊克塔木地方。遇賊兵設立營寨。擊破之。擒殺二十餘人。賊衆悉降。初十日。至皮禪城。有回子兵守城拒敵。官兵進擊。擒回子一人。復遣歸。令曉諭衆回子等。我兵爲征勦策妄阿喇布坦而來。與伊等無涉。若速行歸順。卽免屠戮。否則進兵破城。後悔無及。是日。皮禪城回子頭目。率三百餘人來降。十三日。大兵至吐魯番地方。吐魯番之阿克蘇爾坦。及總管頭目沙克札拍兒等。俱率衆迎降。所獲烏鎗五百五十桿。駝四

十隻馬五百匹。阿喇納等。於七月十六日。帶沙克札拍兒等。及官兵凱旋。得

旨將軍富寧安所奏。著抄發京城。傳諸王滿漢大臣等。公同看閱。九月疏言。臣於七月十八日。至烏魯木齊地方。賊並未設哨。隨遣滿洲官兵。遍行搜尋。亦無踪跡。有烏魯木齊及哈西哈等處地方。回子陸續投降。臣詢以策妄阿喇布坦之信。據稱伊等係哈密屬下人。爲賊兵擄掠而來。本月十一日。賊目徹格爾得。自伊爾布爾和碩奔回。通知信息。云大兵已至。伊爾布爾和碩將台吉吹音拍兒所領之兵。盡行勦殺。故烏魯木齊有吹音拍兒所屬之人。及附近地方厄魯特之人。俱各震驚奔竄。伊等得乘間逃出。卽來投順。又稱烏魯木齊地方。今年甚旱。牲畜倒斃甚多。臣遣人細加偵探。與回子之言無異。其阿喇納襲擊吐魯番兵。先於七月二十四日。回至烏蘭烏蘇。臣所領兵。於八月初二日。亦回至烏蘭烏蘇。初三日。合兵凱旋。初十日。抵巴爾庫爾。十月二十八日。疏言。據軍前副都統覺羅英柱常壽提督路振聲等呈稱。明年大兵進剿。一切軍器馬匹。應

行預備。請借支官兵一年俸餉銀。共三十五萬九千四百餘兩。於每季每月給發俸餉時。伊等所借之銀。扣補還項。如蒙

聖恩俞允。祈卽勅諭甘肅巡撫綽奇按數支給。

詔從所請。六十一年五月疏言。臣接准部咨。今歲大兵移駐烏魯木齊地方。糧餉馬畜能否備辦。來年大兵進剿。馬畜口糧能否接濟。其阿爾泰遣往官兵一萬二千名。以及隨役。自十月起支給糧米。若不敷用。應作何增運之處。令臣與巡撫綽奇會同定議具奏。臣身在軍營。相機而行。未敢

擅離。因移咨巡撫綽奇速行定議。康熙五十四年五十五兩年。臣在肅州辦餉。除按月支給官兵外。又備進剿裹帶之糧二萬一千餘石。運貯軍前。自去年三月。運到軍糧缺少。因令道員王全臣將原貯之糧。通融給散。又給與吐魯番官兵羊隻。繼而運到之糧愈少。臣又令王全臣採買米糧青稞等項。并將銀兩折算配給。是以自去秋以至今夏。不致貽悞。現今巴爾庫爾吐魯番科舍圖。俄隆吉等四處。所有滿洲蒙古綠旗官兵。共二萬一千一百名。計算隨役共三萬三千

四百九十名。每月需糧六千六百九十餘石。自阿爾泰遣往官兵一萬二千名。計算隨役約二萬五千名。每月需糧五千石。今年巴爾庫爾耕種青稞。用過籽粒二千石。至秋成或可獲糧二萬。吐魯番新墾地畝。所獲糧數。難以預定。今支給吐魯番官兵糧米。自五月以來。便不能接濟。臣因移咨協理將軍阿喇納。乘回人所種地畝成熟。於六月初旬。催其收穫。借給官兵。俟米糧運到時。照數給還。或將我兵在吐魯番種獲之糧補給。似此酌量設法。庶可接濟無悞。得

旨酌量設法辦理。惟是吐魯番種地之處。不可不嚴爲防守。前經議政。議遣步兵五千名至彼防守。今年若進兵至烏魯木齊。令將軍等酌留官兵看守田畝。若不進兵。則看守田畝之人。不可無馬。應令將軍等將馬兵酌量派留。照看田地。兼備勦戮潛來侵犯之賊。其糧米足用與否。亦令將軍富寧安查明議奏。六月疏言。吐魯番等處耕種地畝。收貯米糧。甚屬緊要。所有大臣。俱係乘機出征之員。請另派大臣。專司其事。尋奉

旨。交總督鄂海。副都統克什圖。一同管理。若有軍務等

事照常遣用。七月初五日疏言。先經臣將青稞糜米籽種運送吐魯番處。分給兵丁播種。今據大定總兵官張弘印呈稱。回人之田。俱於正月栽種。青稞糜子。已得滋長。我兵種植既已逾時。現今禾苗又復被旱。又據協理將軍阿喇納呈稱。籽種到日已遲。未及播種。俱充作官兵口糧支給等語。臣思回人所種之糧成熟。可催令刈割。借給我官兵。俟兵糧運到償還。但須至八月方能收穫。未收以前。不可不預爲給與。吐魯番所有官兵。應給糧米六分。青稞麥子四分。合運到者

盡屬糧米。除照常運送六分外。其青稞麥子四分。應交與潼商道王全臣。購買麥麩配給。七月二十九日疏言。臣准部咨。現今大兵移駐烏魯木齊地方。其各營軍器整齊。及馬畜能否足用之處。令臣查驗具奏。據都統穆森。副都統薩爾禪。智勇。甘肅提督路振聲等回稱。伊等所屬護軍驍騎綠旗兵丁。一應軍器馬畜俱各完足。無致貽悞等語。又據副都統英柱。常壽等呈稱。從前襲擊吐魯番等處。馬駝稍有疲損。因以俸餉借抵購買補足。預備進剿。今二年有餘。汛防差

使馬駝又不無少虧。仍於現支行糧外。借給庫銀。買補馬駝。此所借之庫銀。於將來應給行糧內。按月坐扣清完等語。臣請允其所呈。借給官兵銀十二萬六千九百九十五兩。令其買補缺額馬駝。並如所請行。雍正元年。陞文淵閣大學士。四年。還。

京十一月初七日。奉

諭旨。富寧安此番軍前所行。甚屬可嘉。但未獲剿滅策妄阿拉布坦耳。富寧安身任將軍。一心肫篤。爲國家宣力。從前再三以進兵奏請於

皇考之前

皇考憐念準噶爾人等。不忍剪除。是以未允其請。倘欲剪除。允其所奏。富寧安定能擒滅策妄阿拉布坦矣。策妄阿拉布坦之所以未滅者。非伊力之不能。實我皇考之至仁也。富寧安在軍前多年。約束兵丁。辦理事務。俱井井有條。而且行止端方。廉潔。此數年以來。領兵之將軍等。聲名未有出富寧安之右者。其於我皇考之寄任。實心奮勉。不負任使。益彰

皇考用人之明。朕實嘉愛。今朕代

皇考推恩。將朕之煖帽。補褂。素珠。賜伊穿帶。及緞疋銀

兩被鞍黃。扯手馬。雙眼翎。特行旌賞。降旨該部。封富寧安世襲侯爵。爾諸大臣皆宜效法富寧安而行。諸凡勿顧目前小利。宜圖久遠榮顯。如顧目前小利。以致聲名大壞。悔之亦無及矣。果能一心効力。豈惟主上嘉愛。卽

上天亦必慈佑。報之以福。今國家昇平。大臣等雖無軍旅効力之處。然內外諸事。俱宜一體盡心。爾等果能以富寧安爲法。一心宣力。朕亦如富寧安一體加恩矣。卽如富寧安。奇立德等。俱係將軍。而奇立德等行爲無恥。上負君上委任之恩。下被屬員鄙薄。蒙古等

譏誚。若朕於奇立德等。亦視如富寧安一體。加以恩榮。衆人豈以朕爲是哉。奇立德等。朕雖未加之以罪。朕意以爲尤甚于加之以罪也。諸大臣祇應各以品行聲名爲念。於國家公務。一意抒誠。勉盡爲臣以忠之道。切勿瑣瑣然懷蓄私意。今富寧安卽標準也。特諭。五年正月。轉武英殿大學士。晉世職爲一等侯。旋奉

命往陝西署理西安將軍印務。六年六月。緣事革去侯爵。尋以疾卒於西安。本月二十三日奉

諭旨。富寧安人品端方。操守廉潔。秉掌銓衡。經理戎政。

敷歷中外。懋著勤勞。謹慎小心。始終一致。簡任綸扉。正資疇毗。忽聞溘逝。朕心深爲軫悼。應得卹典。著察例具奏。其喪輓起程。及歸途之費。著督撫照看料理。經過之處。著地方官員。於輓前奠醢。八月。喪至京師。特遣平郡王。領內大臣一員。侍衛十員。致奠。九月十二日。出殯。又

命平郡王。領內大臣一員。侍衛十員。往奠於其墓。二十七日。

子祭一次。追贈太子太傅。謚文恭。立碑墓道。以彰厥功。云。尼喀納。富寧安之叔祖也。初任三等護衛。康熙

十二年。從征逆苗。耿精忠。隨定南將軍希爾根。至江西。八月。至昌府。敗僞帥李茂珠。李復生等。於鐘鼓山。並略連塘口。馬安寨賊兵。又敗僞俞將軍於浮潭鋪。並在事有功。十五年十二月。隨安南將軍覺羅舒恕。進剿廣東。遇從逆提督嚴自明等。賊兵三萬。於南康縣。奮勇擊之。賊走南安。十六年十月。逆藩吳三桂。僞將軍馬寶等。領賊萬餘。分五路犯韶州。尼喀納。隨鎮南將軍莽依圖。敗賊有功。又擊敗僞總兵姜熊賊兵。十七年。吳三桂病死。十八年二月。隨都統勒貝

等至廣西。敗逆孽吳世璠。偽將軍吳世琮賊兵六千。十九年六月。復敗偽將軍范齊韓。詹仰等賊兵於柳州之陶屯地方。二十年。隨征南大將軍賴塔。進征雲南。正月。破偽將軍何繼祖等於石門坎。三月。復破賊於黃草壩。直抵雲南城。會同三路大兵。平定逆孽。尼喀納。並在行間有功。二十五年。議叙。授拜他喇布勒哈番世職。七月卒。

八旗通志初集卷之一百七十

名臣列傳三十

鑲黃旗蒙古世職大臣

多爾濟達爾漢諾顏

阿什代 顧慕德徹臣

席喇巴雅拉 翁愛

杜爾麻占 綽爾門 子隆古

布葉錫理 羅什

賴護 羅布希

正黃旗蒙古世職大臣

庫魯克達爾漢阿賴

俄本岱

族孫拖克塔哈爾

阿代

弟巴朗陀泮

韋徵

文程

子武程

武京

羅理

弟沙理代

多格申

伊爾度齊

德參濟旺

巴賴都爾莽鼐

哈岱

阿喇納

蘇朗

沙思塔理

孫鄂賴

博爾和對

子廣西

多爾濟達爾漢諾顏蒙古鑲黃旗人。姓博爾濟金氏。世居翁牛忒地方。原係蒙古察哈爾汗之昂邦寨桑。昂邦寨桑猶云大丞相也。天聰八年閏八月庚寅聞。

太宗文皇帝親統六師。出尚方堡駐營。遂同噶爾馬等率男子六千人。併携家口來歸。因授一等梅勒章京世職。崇德六年八月。征杏山。奉命同阿什達爾漢舅舅往視阿賴等杏山駐營之地。並察斬敵多寡。還報稱。

旨。八年六月。以內大臣隨奉命大將軍饒餘貝勒阿巴

泰征明。破山東等處。大捷凱旋。

太宗命和碩鄭親王濟爾哈朗等出迎。與諸王行抱見禮。順治元年推

恩舊臣。由一等梅勒章京世職。加半個前程。累官都察院叅政。十二載考察。以任事有能。又加一拖沙喇哈番。遂加爲三等精奇尼哈番。九年二次恩詔。加授至一等精奇尼哈番。仍加一拖沙喇哈番。十七年卒。

子祭葬。賜諡順僖。

阿什代。蒙古鑲黃旗人。姓揆龍氏。世居克西克騰地方。天聰三年隨大兵征明。用雲梯攻威縣。首先登城克之。

賜巴圖魯號。授牛錄章京世職。崇德六年。擊明經略洪承疇三營步兵。同梅勒章京席喇率擺牙喇敗之。以功加半個前程。順治元年。從豫親王多鐸南征。破流賊。平定河南。進攻潼關。俱率本甲喇兵擊敗賊兵甚衆。又同梅勒章京賴虎破流賊於潼關嶺上。七年

恩詔。加世職爲三等阿達哈哈番。九年二次恩詔。加至一等阿達哈哈番。十五年。從征貴州有功。十

六年。由水路回兵至江南。值海賊鄭成功陷鎮江瓜州。直犯江寧。隨梅勒章京噶褚哈。會同滿漢官兵破賊。事平敘功。由一等阿達哈哈番。超授爲三等阿思哈尼哈番。卒。以其子顧穆承襲。顧慕德。徹臣。蒙古鑲黃旗人。原係蒙古察哈爾林丹汗之昂邦寨桑。天聰六年。林丹汗往奔湯古特。遂率戶口八十衆來歸。授爲三等總兵官。崇德三年。隨揚威大將軍貝勒岳託征明。攻高陽縣城。不用雲梯。奮勇先登克之。有侯總兵率兵來戰。迎擊敗之。七年。從征明。圍錦州。同左翼三固山兵擊松山馬兵敗之。松山兵復來奪我紅衣礮。又率兵擊却之。又同右翼兵擊敗明經略洪承疇馬兵。洪承疇遣三營步兵來犯。復擊敗之。敘功。加世職爲二等昂邦章京。順治元年。隨睿王多爾袞入山海關。擊流賊。又隨英親王阿濟格追流賊至慶都縣。三年。隨豫親王多鐸往追騰吉思。擊土謝圖汗兵。又擊碩羅汗兵。並有功。加世職爲一等精奇尼哈番。三遇

恩詔。准世襲罔替。緣事革去世職一半。降爲一等阿思哈尼哈番。兼一拖沙喇哈番。尋以所議過重。復

授爲三等精奇尼哈番。康熙六年卒於所居努克特勒地方。

予卹如典禮。

席喇巴雅拉。蒙古鑲黃旗人。姓布庫特氏。世居扎魯特地方。初任牛彖章京。累陞至梅勒章京。崇德三年。從征明至山東。遇馮太監兵。同固山額真吳賴擊敗之。將出邊。復擊敗三屯營陳總兵馬步兵三千衆。奪其挨牌火礮。與敵兵相拒。七晝夜於山巔。以功授牛彖章京。世職。順治元年。從睿王多爾袞入山海關。擊流賊步戰。敗其兵。論功加半個前程。二年。隨豫親王多鐸南征。平定淮安。於黃河淮河會合處。遇敵兵二萬衆。同準塔巴圖魯擊敗之。又有僞郭副將兵千餘。駐鷺台山島。復攻克之。三年。從肅親王豪格征四川。擊郭世礪兵三千於山上。又屢敗賊渠八大王張獻忠馬步賊兵甚衆。因加世職爲三等甲喇章京。七年。

恩詔。加授二等阿達哈哈番。九年。二次

恩詔。加至一等阿達哈哈番。又一拖沙喇哈番。尋卒。以

其孫卓特博承襲。

翁愛。蒙古鑲黃旗人。姓卓爾古特氏。世居科爾沁地方。初任牛朶章京。崇德二年七月。同海塞等。率兵一千二百。分道往征瓦爾喀有功。尋往義州管固山官田。獲糧甚多。崇德八年六月。隨奉命大將軍饒餘貝勒阿巴泰。征明。攻山東莒州城。率本甲喇兵。首先登城。大捷。凱旋。得賞銀四十兩。順治元年。署梅勒章京。留守盛京。約束兵馬有法。敘前功。授半個前程。後改任禮部理事官。尋以考察辦事有能。加世職爲牛朶章京。是年。隨固山額真葉臣等。征山西。至太原府。環視城四面。以定攻取計。忽城內步兵突出。卽率本甲喇兵。大敗之。二年。從英親王阿濟格。征流賊。至陝西綏德州。城內馬步兵擁出。仍大敗之。追流賊李自成。至九公山。尋覓賊踪。擊敗僞吳伯賊兵三千餘。三年。從肅親王豪格。征四川流賊。至雞頭關。賊兵甚衆。率本甲喇兵。擊敗之。又隨鰲拜等。擊敗賊渠八大王。張獻忠馬步兵。又敗僞霍總兵二千餘衆。五年。論功。加一拖沙喇哈番。七年。

恩詔。加爲三等阿達哈哈番。九年。二次

恩詔加至一等阿達哈哈番。卒。以其弟特澤承襲。

杜爾麻占。蒙古鑲黃旗人。姓西納明安氏。世居庫魯末博爾地方。生而多力。初從征大同。進邊至宣府城。有總兵一人。領兵千餘出迎。遂執大刀。同多爾機昂邦得黑墨等。追殺至城濠邊。因賜名巴圖魯。有察哈爾部屬歸順。在

篤恭殿朝會時。與甲雅汗占相撲。爲角觝之戲。莫有能勝甲雅汗占者。王貝勒等謂杜爾麻占云。爾若撲倒此人。有重賞。遂於大眾前。應聲摔倒甲雅汗占。崇德六年。大兵圍錦州。明經略洪承疇

來援。率兵至松山。遣往松山杏山之間立營。截殺其衆。敵兵自知難支。竟自奔潰。又聞明總兵等官遁入杏山城。遂同多爾機昂邦石翰往桑阿兒機堡埋伏。杏山馬兵遁出。手殺五人次日。隨多羅豫郡王率兵往伏。遇杏山城官與兵逃出。追殺八人。是夜復領轄二十人。於塔山坡截路。殺三十餘人。進圍松山城。城中遁出馬步兵闖入我營。又同石翰從濠邊力戰却敵。因授三等甲喇章京。世職。順治元年。加敘舊臣功績。因

陞世職爲三等梅勒章京。七年

恩詔加爲二等阿思哈尼哈番。八年正月任議政大臣。

九年二次京世顯職。前大半以功。後因

恩詔加至二等精奇尼哈番。康熙三年卒。賜祭葬如典禮。諡曰忠直。立碑墓道。碑文稱其賦性純良。制行忠勇。膂力過人。忠勤素著。云子沙吉。仕至內

大臣。孫齊錫襲世職。

綽爾門蒙古鑲黃旗人。姓喀爾諾特氏。世居察哈爾地方。原係察哈爾汗之阿濟格寨桑也。阿濟格寨桑猶云小丞相。其主林丹汗故後。率戶口四百三十。同達三濟旺來歸。授一等梅勒章

京世職。崇德六年。大兵圍錦州。同袞出格。敗。明經略洪承疇三營步兵。其敗兵又會合松山馬兵來戰。復大敗之。順治三年五月。隨揚威大將軍德豫親王多鐸。征蘇尼忒部落。騰吉思等。同顧木德。擊土謝圖汗兵。敗之。又敗碩羅汗兵。以功。由一等梅勒章京。加半個前程。卒。以其子隆

古承襲。順治十一年。隆古從靖南將軍朱瑪喇。征廣東。至新會縣城左邊山上。遇僞晉王李定國。步兵萬餘衆。羅列鎗礮。挨牌拒敵。率本甲喇兵。隨大兵進擊。敗之。又敗李定國步兵四萬於

新會縣山峪內以功由一等阿思哈尼哈番加
一拖沙喇哈番爲三等精奇尼哈番卒以其子
阿喇納承襲

布葉錫理蒙古鑲黃旗人姓鄂爾克特氏世居
喀爾沁地方初任擺牙喇甲喇章京崇德七年
隨大兵圍錦州擊松山敵兵大敗之順治元年
入山海關同尚書鞏阿岱率擺牙喇兵敗流賊
又追流賊至慶都縣擊敗之以功授半個前程
尋出駐防濟寧州擊僞劉總兵馬步兵二千衆
親領纛敗之三年隨肅親王豪格征四川圍三

寨石惟璽等奪取寨門賊武大定率兵來戰卽
同柯科奮勇擊敗之賊將高汝礪又率兵三千
駐立山上亦擊敗之遇賊渠八大王張獻忠率
兵來戰又擊敗之又敗其馬步兵六次於馬湖
府賊將楊展以兵千餘衆來戰皆擊敗之五年
姜瓖叛隨大兵圍大同以紅衣礮攻其關廂賊
兵來奪我礮同法特哈擊却之賊兵又來衝我
土默特汎地亦擊却之進取汾州府有僞楊嗣
將兵萬餘列陣山上兩次擊敗之七年

恩詔加世職爲拜他喇布勒哈番八年敘功加一拖沙

喇哈番九年二次

恩詔。加至二等阿達哈哈番。十三年。任肅章京。康熙十二年。加太子少傅。十三年卒。

子祭葬。諡壯果。

羅什。蒙古鑲黃旗人。初任牛錄章京。崇德七年。從奉命大將軍貝勒阿巴泰征明。擊三河西駐立馬步兵。敗之。至渾河搭橋。有范軍門兵來襲。我兵後。卽率本甲喇兵擊却之。順治元年。從睿王多爾袞入山海關。擊流賊。以步戰有功。授牛錄章京。世職。十月。隨定國大將軍豫親王多鐸

南征。破流賊於潼關山上。擊其馬步賊兵。敗之。又破流賊第二營步兵。二年二月。從征南大將軍貝勒博洛。平定福建。有僞伯吳凱兵五百來戰。羅什同和陀以步戰。敗之。五年。從征南大將軍固山額真譚泰。往江西。征叛鎮金聲桓。有賊渠僞建武侯王得仁。率兵五千。來犯正白旗壕塹。卽率本固山兵助擊敗之。王得仁又率兵七千。來犯本固山壕塹。仍擊敗之。又同俄諾擊敗賊馬兵三千。進攻南昌府。各旗指揮兵丁用雲梯攻城。羅什率本固山雲梯先至。遂先登克其

城論功。加世職爲三等阿達哈哈番。七年九年
三次

恩詔。加至一等阿達哈哈番。十八年。任副都統。出征雲
南病故。

予祭葬如典禮。

賴護。蒙古鑲黃旗人。屢從征伐有功。累陞至梅
勒章京。順治元年。

恩詔。授半個前程。十一月。從豫親王多鐸南征。破流賊。
平定河南。汪南。並有功。破潼關時。有流賊從山
上來犯。率本固山兵擊敗之。賊兵夜犯我營。亦
率兵擊却之。又在潼關連擊破流賊頭營二營。
論功。加授牛录章京。世職。七年。

恩詔。由拜他喇布勒哈番。加一拖沙喇哈番。八年卒。以
其子綽什希承襲。

羅布希。蒙古鑲黃旗人。姓齊墨特氏。世居喀喇
沁地方。順治五年。從征江西。叛鎮金聲桓。用雲
梯攻南昌府。第一登城克之。

賜名巴圖魯。授爲二等阿達哈哈番。七年。

恩詔。加授一等阿達哈哈番。九年。

恩詔。又加一拖沙喇哈番。康熙十五年。從征逆藩吳三

八旗通志 卷一百一十一
桂。至湖廣醴陵縣。遇吳逆偽將軍馬寶。率賊三萬餘衆。力戰陣亡。以其子達錫馬。承襲一等阿達哈哈番。兼一拖沙喇哈番。二十五年。追敘陣亡事。卹贈加世職爲三等阿思哈尼哈番。

右俱鑲黃旗蒙古世職大臣

庫魯克達爾漢阿賴。蒙古正黃旗人。姓莽那特氏。世居喀爾喀圖虎爾扎地方。自喀爾喀携眷來歸。奉使招降阿魯都冷郡王。盡收其部落。

賜名達爾漢。優免賦役。毛名安下五貝勒。自阿魯來歸。

旋率所屬叛去。衆外藩蒙古貝勒引兵追擊。不及而還。達爾漢阿賴獨率蒙古兵五百往追。經半載。渡俄嫩河。至阿固地方。斬毛名安下首叛貝勒四人。盡俘其部落。時喀木尼喀部落。與我國語言不通。遂移師擒其部長葉雷。並所屬人馬以歸。論功。

賜名爲庫魯克達爾漢。授一等叅將世職。崇德元年。又

加半個前程。六年八月。隨大兵征明圍松山。十一月。明經畧洪承疇。從城內出兵來戰。同各營兵沿壕射之。敵敗退回松山。收其衆二千餘。順治五年。同尚書宗室吳達海等。率兵駐防漢中。

六年。山西叛黨姚舉率衆猖獗。殺運餉道員王昌齡。犯忻州等處。庫魯克達爾漢阿賴統官兵破之於石嶺關。賊退據忻州。復率官兵追至城下。大破之。斬首二千餘級。復忻州。九年。兩遇恩詔。加世職爲二等阿思哈尼哈番。仕至都統。兼禮部尚書。加太子太保。十六年。以老疾乞休。奉

世祖諭。庫魯克達爾漢阿賴在都統任久。著有勞績。准以原官致仕。康熙十七年卒。

賜祭葬如典禮。諡襄武。以其弟之孫高良襲世職。

俄本岱。蒙古正黃旗人。姓曼精氏。世居喀爾喀

地方。初投明朝。任守備官。天命六年。我師克遼東。率三十五人。并馬六十匹來降。七年。從大兵征明。克廣寧城。以功授遊擊。世職。天聰元年。攻錦州城。敗敵兵二千。進攻寧遠城。城中兵出戰。率五牛录甲士擊敗之。加授二等叅將。世職。二年。從征察喀爾多羅特部落。率精銳二百人往。連戰皆敗之。敵回兵死戰。衆潰。俄本岱獨力拒戰。敵始退走。論功加授一等叅將。三年。隨大兵征明。方入邊。遇敵兵五路來犯。率本固山兵擊敗之。斬叅將一員。獲人馬。并奪其纛。敵兵駐大

安口。率本固山兵往擊。拔其城。自遵化回兵。敵衆來追。四面環圍。率甲士五十人。敗其哨卒百八。斬七十餘級。因謂蒙阿圖察哈爾曰。可乘此出矣。遂率本固山兵由大路出。敵兵列陣來戰。一驍將持鎗突至。俄本岱迎斬之。敵遂潰。仍居殿防護。我兵得盡出。敘功。加至三等副將。天聰九年卒。兄瓦色襲。三傳至土梅。土梅卒。子拖克塔哈爾襲職。康熙三十五年。隨撫遠大將軍伯費揚古。由西路征厄魯特噶爾丹。時

聖祖從中路親征。已至克魯倫河。拖克塔哈爾聞之。激

勵士衆誓死圖報。至昭莫多地方。噶爾丹以衆來犯。遂隨大將軍率衆奮勇力戰。大敗之。以功加世職爲三等精奇尼哈番。五十二年。病卒。銷去後加世職。存二等阿思哈尼哈番。以其子記柱襲。

阿代。蒙古正黃旗人。姓鄂爾果諾特氏。世居喀爾喀地方。

國初從蒙古喀爾喀來歸。授三等甲喇章京。世職。天聰元年。大兵征朝鮮。率蒙古八固山駐防倚蘭布里湖。殺明兵一千餘。擒遊擊一員。師旋。道

遇明兵。復追殺無算。又明兵千餘犯我西門城。聞之。馳往擊敗之。阿代俱在事有功。加世職爲二等甲喇章京。仕至固山額真。崇德四年卒。孫色布德襲。順治七年。

恩詔。加至一等阿達哈哈番。卒。以其伯父善丹襲。遇九年。

恩詔。又加一拖沙喇哈番。善丹卒。以弟之子巴朗襲職。是年再遇。

恩詔。累加至三等阿思哈尼哈番。十一年。靖南將軍朱瑪喇征廣東。破僞安西王李定國於新會縣之左山。巴朗同杜克喇擊賊有功。又敗其衆四萬於新會縣之山峪。加世職爲二等阿思哈尼哈番。十三年卒。弟陀泮襲職。康熙十四年。從征逆藩吳三桂。由陝西進四川。隨前鋒統領穆占等。敗僞總兵石遵禮等賊一萬七千餘於朝天關。破其木城凡三十餘座。自盤龍山旋師至孃孃廟。遇僞將軍吳之茂。引馬步萬餘於兩處立寨。斷截行路。仍率本甲喇兵。隨大兵擊敗之。又破賊於張飛廟。又敗僞將軍王屏藩等於槐樹驛。又於小梅嶺及龍潭驛等處。連敗賊衆。陀泮並

八旗通志 卷一百一十五
在事有功。加世職爲一等阿思哈尼哈番。
韋徵。蒙古正黃旗人。姓齊岳噶穆忒氏。初自科爾沁來歸。天聰三年。隨大兵征明至通州。敵兵來犯。韋徵率本固山兵擊敗之。又率本固山兵破明經畧盧象昇營。又隨昂邦章京席特庫掠興安。生擒哨卒一人。斬八十五級。獲馬五十匹。駝九隻。崇德六年。從大兵征明圍錦州。明經略洪承疇合兵來援。立步卒三營。韋徵率本固山兵。隨固山額真譚泰及右翼甘都擊敗之。又敗敵騎兵兩次。七年。以善戰有功。授半個前程。世職。順治二年。以係

太宗文皇帝眷顧舊臣。加世職爲牛叅章京。七年九年。三遇

恩詔。累加至二等阿達哈哈番。任梅勒章京。十一年。征湖南。遇僞秦王孫可望。馬步兵於岔路口拒敵。力戰陣亡。加贈世職爲一等阿達哈哈番。以其子博洛齊襲。

文程。蒙古正黃旗人。姓喬噶木克氏。世居科爾沁地方。

國初來歸。授轄員。天聰三年。擢梅勒章京。從征明

八旗通志 卷三十一
至通州。敗明經畧盧象昇兵，斬八十五人，獲馬五十匹，駝九隻。崇德六年，從征明圍錦州，復敗明經畧洪承疇兵，論功授半個前程。順治二年，以係

太宗文皇帝眷顧舊臣，加授牛录章京世職。七年九年，三遇

恩詔，加爲二等阿達哈哈番。卒，子武程襲官，至副都統。以從征歿於陣，議卹，加至一等阿達哈哈番。

武京蒙古正黃旗人。天聰三年，從征明至通州河邊，遇敵衆來拒，奮擊敗之。又敗明經畧盧象昇兵六年，同昂邦章京席特庫往征察哈爾，至興安伊喀倫地方，生擒一人，斬八十五人，獲馬五十匹，駝九隻，以歸。崇德六年，從征明圍錦州，復同固山額真譚泰等敗敵有功。明年議敘，授半個前程。順治二年，以係

太宗文皇帝眷顧舊臣，加牛录章京世職。七年九年，三遇

恩詔，累加至二等阿達哈哈番。是年以梅勒章京隨敬謹親王尼堪往征湖廣，至岔路口，遇僞秦王孫可望兵，奮勇進擊，遂歿於陣。加贈爲一等阿達

哈哈番。

羅理。蒙古正黃旗人。姓鄂爾沁氏。初仕察哈爾林丹汗。天聰六年。林丹汗敗遁。八年。歿。羅理乃攜戶口一百人來歸。授一等甲喇章京。世職。崇德三年。隨揚威大將軍貝勒岳託征明。擊敗明密雲縣兵。六年。從大兵征明錦州。挖壕圍城。城中馬步全軍出戰。我左翼三固山擺牙喇兵擊之。不勝。退保壕塹。羅理亦以堅守汛地。竭力拒戰。陣亡。加贈梅勒章京。世職。以其兄沙濟襲。沙濟卒。并與弟沙理代襲。初沙理代兄吳班和碩齊。亦以察哈爾林丹汗歿。攜戶口七十人。同哲爾墨來歸。授三等甲喇章京。世職。既歿。沙理代襲。兄職。順治元年。隨大兵入山海關。以步戰。敗流寇。三年。隨豫親王多鐸追騰吉思。敗土謝圖汗兵。又敗碩羅汗兵。以功加二等阿達哈哈番。十五年。又襲兄沙濟三等阿思哈尼哈番。併爲二等精奇尼哈番。世襲罔替。康熙九年卒。親叔之孫達爾查襲。

多格申。蒙古正黃旗人。姓克蘇特氏。世居克西克騰地方。初投明朝。天聰六年。我師征明至大

同多格申率七十戶來歸。是年大兵征察哈爾。以多格申爲鄉導前驅。有功。又以往弔其姻家之喪。道遇蘇尼特。逃黨多吉。台吉。訊知吳班代達爾漢巴圖魯。及五台吉逃走。卽同達爾漢卓禮克圖固山額真白內德吉多機台吉率百人往追。自與白內疾馳。先衆追及。敵列陣以待。遂單騎詣敵說之降。以功授牛錄章京世職。順治七年九年。三遇

恩詔。累加至二等阿達哈哈番。仕至副都統。康熙八年卒。

伊爾度齊。蒙古正黃旗人。初管甲喇章京事。天聰八年七月。隨大兵征明。由宣府入邊。伊爾度齊率族人攻下十二堡。八月班師。遣伊爾度齊同敦多惠等齎

勅以入邊功諭留守諸貝勒。崇德六年。從征明寧遠。率

本固山擺牙喇敗其騎兵。圍錦州時。率本甲喇甲士。敗敵兵於山城。圍松山城。敵犯我鑲黃旗汛地。同季思哈擊敗之。又敗土臺壕邊敵兵。八年。從攻明前屯衛城。於紅衣礮擊破處。率本固山擺牙喇先登克之。授半個前程世職。順治元

年。隨睿王多爾袞入山海關。敗流寇。追至慶都縣。復大敗之。以功加牛錄章京。兼半個前程世職。十二月。隨定國大將軍豫親王多鐸南征。至潼關。我師駐札山巔。流寇以步卒來犯。率本固山擺牙喇擊敗之。又連次敗其騎兵。流寇乘夜來劫我營。率本固山擺牙喇出擊。追奔至壕而還。二年正月。賊將劉方亮擁眾來窺我營。同燾章京圖賴等率五旗擺牙喇擊敗之。四月。大兵至揚州。距城二十里列營。同署燾章京古納岱等率師至城南。獲敵船二百餘。六月。隨貝勒博洛征杭州。同鄂碩勞漢往偵渡口。遇偽王總兵三百騎擊敗之。又同巴朗格巴庫充阿。敗偽王總兵苗總兵。又同吳喇屢追敵至太湖。戰敗之。獲船十一。又同巴朗偏俄宗室古納岱。敗偽陳總兵軍。獲船十二。追平湖敗軍。又獲船十九。至平湖縣。敵人來犯。卽同格巴庫八代乘舟擊敗之。獲船二十一。加世職爲三等甲喇章京。三年。隨豫親王多鐸征騰吉思。同科爾沁二郡王加沙格貝子。分兵追至土喇河。值梅勒章京明安達禮等續至。卽同率前鋒馳往追逐。連戰皆敗。

之。復同鎮國公汪達。內大臣吳拜。竭力窮追。斬十一級。俘獲甚衆。又擊敗土謝圖汗。及碩羅汗兵。加世職爲二等阿達哈哈番。六年。隨定遠大將軍鄭親王濟爾哈朗南征。攻克貴州黎平府。敗僞帥何永忠。追至永從縣。復大敗之。七年。九年。三次。

恩詔累加至二等阿思哈尼哈番。康熙十三年。逆藩吳三桂反。伊爾度齊以護軍統領。同貝勒察尼等隨順承郡王勒爾錦出征。參贊軍務。至荊州。十六年。四月。歿於軍。加太子少師。

德參濟旺。蒙古正黃旗人。姓白爾濟吉氏。世居阿布漢地方。初係察哈爾國之昂邦。天聰八年。八月。察哈爾汗歿。同其國噶爾馬濟農等攜家口并所屬六千人來歸。授一等昂邦章京。世職尋緣事降爲二等。順治四年。隨揚威大將軍豫親王多鐸追騰吉思。敗土謝圖汗兵。又敗碩羅汗兵。敘功。復世職爲一等昂邦章京。五年卒。巴賴都爾莽。蒙古正黃旗人。姓吳米氏。初係察哈爾之昂邦寨桑。察哈爾林丹汗敗奔湯古忒。遂自率戶口二百三十餘。駐哈屯河對岸。

太宗文皇帝遣使招之。不至。踰一載始來歸。崇德元年。授梅勒章京世職。三年。從大兵征明。敗明吳總兵馮太監等兵。敵人犯我噶布什賢噶喇昂邦席特庫營。卽率衆往援。却之。十月。隨大兵攻寧遠。城中騎兵出戰。擊敗之。六年。從大兵征明。圍錦州。屢敗明經畧洪承疇兵。是年掘壕圍錦州。城中敵兵出犯。力戰陣亡。加贈世職爲三等昂邦章京。

哈岱者。巴賴都爾莽鼐子也。天聰六年。襲父三等昂邦章京世職。順治元年。隨睿王多爾袞入山海關。擊敗流寇。追至慶都縣。復大敗之。二年。從貝勒博洛征浙江。至杭州。敗僞陳總兵於海寧城外。三年。隨揚威大將軍豫親王多鐸。征騰吉思。敗土謝圖汗兵。又敗碩羅汗兵。俱在事有功。加世職爲二等精奇尼哈番。九年。

恩詔。准世襲。十一年。隨寧海大將軍宜爾德。征海寇。破

僞英毅伯阮思等於海上。舟山平。以功加世職爲一等精奇尼哈番。仕至內大臣。以疾卒。

阿喇納者。哈岱子也。康熙十九年。襲父一等精奇尼哈番世職。任散秩大臣。五十四年。厄魯特

策妄阿喇布坦侵犯哈密。

聖祖仁皇帝命吏部尚書富寧安往西安商酌援剿。以

阿喇納同行。五十七年。策妄阿喇布坦遣賊將

襲取西藏。大兵分三路進剿。阿喇納進吐魯番

一路。八月靖逆將軍富寧安疏報。阿喇納領兵

進至齊克塔木地方。擊斬賊二十人。餘賊悉降。

進至皮禪城。回子頭目率三百餘人來降。因同

富寧安率大兵至吐魯番地方。吐魯番阿克蘇

爾坦及總管頭目沙克扎拍爾等。俱率衆迎降。

七月十八日。進至烏魯木齊地方。有回子陸續

來降。據稱原係哈密爲賊所掠。今賊目徹格爾

得自伊爾布兒和碩奔回。將台吉吹音拍爾之

兵盡行剿殺而去。阿喇納等遂凱旋。至烏蘭烏

蘇合兵。八月初十日。抵巴爾庫爾地方。尋移駐

布隆吉爾地方。雍正元年十月。陞鑲紅旗蒙古

都統。二年三月卒於軍。

賜祭葬如典禮。諡僖恪。以其軍前効力有年。又加一拜

他喇布勒哈番世職。晉爵爲三等伯。以其子烏

米泰承襲。

蘇朗蒙古正黃旗人。姓吳朗堪氏。原係喀喇沁

昂邦之裔。崇德二年。其族人蘇布第率諸塔布囊來降。蘇朗亦引丁壯六十八名來歸。授牛彖章京。世職。仍管喀喇沁牛彖事。兼任甲喇章京。三年。隨揚威大將軍貝勒岳託征明。至北京。同梅勒章京甘都擊敗明兵。六年。從大兵征明。圍錦州。同梅勒章京甘篤擊敗杏山騎兵。圍困松山時。有步卒來犯壕塹。擊退之。順治元年。隨睿王多爾袞入山海關。以步戰敗流寇。二年。敘功。超授二等甲喇章京。世職。六年。任正黃旗滿洲梅勒章京。七年。九年。三遇。

恩詔累加至三等阿思哈尼哈番。康熙十三年。逆藩吳三桂反。蘇朗以副都統帥蒙古兵一千鎮守池州。閏五月。寧南靖寇大將軍順承郡王勒爾錦奏吳三桂犯荊州。請添兵。揚威大將軍簡親王喇布又奏逆藩耿精忠賊兵由江西窺伺池州。因

命蘇朗分帶蒙古兵六百至武昌。合兵一千。赴荊州。援。勦。至其地。以病卒於軍。

沙思塔理。蒙古正黃旗人。原係喀喇沁國昂邦之裔。父伊林臣。於

國初率六十人來歸。卽命管喀喇沁牛錄事。授遊擊世職。旣卒。沙思塔理始襲父職。順治元年。隨睿王多爾袞入山海關。同英格壽等擊敗流寇。又同每固山章京各一員。甲士各四十名。追勦流寇。遇僞毛總兵擊敗之。以功加世職爲二等阿達哈哈番。五年。擢理藩院侍郎。七年。九年。三遇

恩詔。加世職至三等阿思哈尼哈番。病卒。子札世襲職。緣事降爲二等阿達哈哈番。再傳至孫鄂賴襲職。任理藩院郎中。兼步軍副尉。康熙五十七年。隨定西將軍噶爾弼征四川。外理塘。巴塘。諸番。五十八年。噶爾弼奏遣至察木多等處。招降洛龍宗。朔般多。達爾宗。桑阿。覺宗。臨忒奇。五十九年。隨噶爾弼進討準噶爾。策楞。敦多布等。招降索克三丹公。朱公。吉東。龔布等處之拉禮。墨朱。工忒。又調取湯古忒兵。斷賊將策楞。敦多布等運糧之路。以功加一拖沙喇哈番。授爲一等阿達哈哈番。

博爾和對。蒙古正黃旗人。姓空克禮氏。世居西克西騰地方。父巴圖原隸察哈爾。天聰六年。察

哈爾林丹汗奔湯古忒巴圖遂投明任千總順
治元年率丁壯一百二十人來歸授牛条章京
世職九年二次

恩詔加至三等阿達哈哈番十年以老乞休博爾和
對襲職十五年隨信郡王多尼征僞桂王師次
湖廣靖州僞總兵田國興黃世貴欲來納款爲
賊衆所阻博爾和對隨肅章京鄂訥等往迎遇
賊二千餘人擊敗之挈國興等來歸進兵至貴
州僞總兵羅大順擁衆三萬餘列陣於十萬崎
山拒敵博爾和對隨將軍等進戰敗之十六年

凱旋由水路至江寧值海賊鄭成功陷鎮江瓜
州寇江寧卽同梅勒章京噶褚哈會同本地官
兵擊却之又連敗江岸賊衆十七年敘功由三
等阿達哈哈番超授一等阿達哈哈番康熙十
二年授察哈爾提督奏請以長子哈喇扣襲其
世職二十九年以提督統察哈爾兵隨撫遠大
將軍裕親王福全征厄魯特噶爾丹遇賊於烏
蘭布通擊敗之卽在軍前授爲叅贊大臣尋奉
詔入噶爾丹取其降素回遇喀爾喀賊衆來犯力戰歿
於陣。

賜祭葬如典禮。諡襄愨。又卹贈一拖沙喇哈番。以其次

子席喇布承襲。卒。弟廣西襲。五十七年。任叅領。

隨定西將軍噶爾弼安輯西藏。在事有功。加授

拜他喇布勒哈番。雍正三年。轉護軍叅領。四年。

陞鑲藍旗蒙古副都統。

右俱正黃旗。蒙古世職大臣。



